



TAPAK 2

Assam nung ochimashi kanga ajema kümogo: Sonowal



TAPAK 9

Tir election ajanga BJP anema party tem longjemtsü: Sharad Yadav

VOL. XIV NO. 191 (ADOK 191)

DIMAPUR

MONDAY

MAY 01, 2017

5.00

Süpokrem agütsüba candidate tem disqualify asütsüla: EC

New Delhi, April 30 (Agencies): Tamil Nadu by elections nung vote agütsürtem mesüzüksü atema sentong balala atonga inyakba putetba sülen, Election Commission-i vote agütsür nem süpokrem agütsüba atema tai tonglokja aliba candidate tem küm pungu disqualify asütsü atema sorkar dangi abentsü.

Okadaki tai tongloktsüba candidate tem küm pungu atema Lok Sabha aser assembly elections nung shilem magütsü

Representation of the People Act nung temelenshi kar süang ta ECI-i Law Ministry dangi tebilemba abentsü lemetogo.

Tan ita tetenzüklen RK Nagar Assembly by election nung voter tem atsür arutsü atema sen amshiba putetba sülen Commission-i by election thinen.

RK Nagar Assembly by election ji April 12 nü agütsüba liasü. Taoba Tamil Nadu chief minister J Jayalalitha asüba agi iba menden tazüng aküm.

Dimapur nung nisung 3 tsükset



Dimapur, April 30 (TYO): Dimapur kübok Chumukedima anasa National Highway- 29 nung Deobar anüngdang mejangjatetba gari kati nisung asem tsükset.

Nisung asemji scooter ka nung mener lia gari jagi tsükdoker jena ao, ta osang angazüker.

Lendong atalokba osang angashili traffic kettangsertem tesem tonga orr yirua alirtemji HK hospital, Chumukedima nung anepalutsü atema anir ao. Ajisüaka, par asemprongla mozükidang asü.

Lendongji nisung maliba tesem ka nung atalokba agi gariji mejangjateti lir, ajisüaka

temulung melemi bilemba gari indang osangji tanga check post aser police station tem nem osang sangoktsüogo, ta traffic kettangser kati ashi.

Tanü lendong nung taküm samar ajakji Mokochung district kübok Longkong yimertem lir aser parnokji K Imsong (küm 38), Limalepzuk Longkumer (küm 45) aser Limakumba Jamir (küm 35) ta jangjaogo.

Par asem indang mang tendanga repringba sülen kinünger ket nung agütsüogo aser iba dak sendakba nung ken o benoker bushisüngdang ka tenzükogo, ta kettangserisa shisem.

Manipur State Transport tentettsü

Imphal, April 30 (April 30): Manipur Cabinet-i Manipur State Transport (MST) tentettsü atema telemtetba agiogo aser taruba ita ka tsüngda bus service tenzüksü.

Chief Minister N Biren Singh-i anir Cabinet senden ka amendang Manipur State Transport tentettsü aser tetenzüklen Transport Department-i kettangsäa repringtsü atema telemtetba agi, ta Manipur sorkar kettangser kati ashi.

Iba maparen nung MST kübok private operator temia shilem agütsü. Maparen tetenzüklen MST-i lenmang 14 nung senzütsü. Lenmangtemji Imphal den Churachandpur, Pherzawl, Bishnupur, Jiribam, Noney, Tamenglong, Kangpokpi, Senapati, Ukhrul,

Kamjong, Thoubal, Kakching, Chandel aser Tengenoupal district tem sendakteptsü.

Manipur nung lendenlen aliba district tem nung lenmang temesü aser gari anendak tesem peria meliaka, gari aser lenmang nung senzüsenbonger onsara kümogo aser iba ajanga küm piyong traffic timtem ajurur. Iba khuret atema Cabinet-isa Imphal telongtet nung traffic kettangsäa repringtsü atema Superintendent of Police (Traffic) aser Additional Superintendent of Police (Traffic) mapatem tentettsü lemet.

Tawa Manipur nung cyber crime kanga bulua atalokba atema Cabinet-i iba dak sendakba ken o tem kettangsätsü atema Deputy Superintendent of Police mapata tasen ka shimtsü Cabinet-isa telemtetba agi.

Niti Aayog-i 2024 nungi LS & Assembly elections külemi aginür

New Delhi, April 30 (Agencies): 2024 nungi Lok Sabha aser assembly elections kasa mapang nung shilem ana lemsar agütsüla ta Niti Aayog-i tebilemba metetdaksüogo.

Election atema nüboyimba maparen inyakba ajanga sorkar kettangsäbaren nung timtem majurutsü atema parnoki iba tebilemba abener.

Niti Aayog-i ashiba agi, iba tebilemba ya mapa küma inyakra state assembly kar khen atema sota ayutsü mesüra mapang talila apuloktsütsüsa akümtsü.

Iba tebilemba ya Election

Commission-i shisadangtsü aser elections mapang ka nung külemi agütsü atema inyakyim latettsü atema telok ka tentettsü atema Niti Aayog-isa parnok dang shiogo.

Iba dak sendakba osang ka taruba ita trok tsüngda renemtsü aser tatembangba telemtetba ka sangküm March ita tashi nung renemtsü, ta 2017-18 nungi 2019-20 draft three-year action agenda nung shia lir.

Iba draft report ya April 23 nü Niti Aayog nung Governing Council züngsem ajak nem agütsüogo. Iba Council nung state ajak nungi chief minister tem dena lir.

President Pranab Mukherjee aser Prime Minister Narendra Modi nati Lok Sabha aser assembly elections külemi agi nung ajungtsü ta jembiyonga arur aser Niti Aayog-i iba tebilemba benokba ajanga tenati jembia aruba onük mapa akümer.

"India nung elections mapang 'campaign-mode' ajanga sorkar kettangsäbaren nung timtem majurutsü atema elections ajak mapang ka nungdang agütsüla. 2024 nungi mapang ka nung election shilem ana lemsar agütsü atema asenoki sentong atongtsüla" ta Niti Aayog draft report nung shia lir.

BJP aser RSS dak lendong keta lir: K. Therie

Dimapur, April 30 (TYO): Nagaland State BJP-i nübortem ola angashia Khristan yimsü kümzüka ayutsü ta lemetogo saka iba kisüng jagi meperir, kechiyong BJP indang shisalen sayurji RSS lir aser iba nung lendong keta lir, ta NPCC President, K. Therie-i ashi.

RSS-i rara ka tenzük aser ibaji 1925 küm Hindu Linük ka akümtsü nükjidong nung

tenzükba liasü. Tang RSS volunteers million 6 shi lir aser RSS tesayuba agütsüba school 6,000 lapoka lir. BJP mapa inyakerkem ya RSS züngsemtem lir aser BJP General Secretary shinga kibong küma mali, kechiyong parnoki mapang peria agüja inyaksü atema kibong makümer, ta NPCC President-i sangdong ka nung metetdaksü.

Parnoki mapang talangka agia

inyaksü sentongtem atonga inyaker aser secularism tangatetba anema mapang talangka sentongtem atonga inyakba telokji RSS lir.

RSS-i Khristantem anema inyakbaji alima nguogo aser alima lennirtemi India nung BJP sorkar dang Khristan tamangba anogotem mezüngmeshiba aser sensatsüba atema tekümdangtsü osangtem metetdaksüogo.

(Maneni tapak 11 nung...)

Tanü nungi anogoshia Petrol aser Diesel jenjang repringshimtsü

New Delhi, April 30 (Agencies): Hombor nungi teshimtet jilatem nung petrol aser diesel jenjang anogoshia international jenjangtem den medemdanga repringshimtsü.

Linük nung petrol pump 58,000 jungnüa aliba nungi shilem 95 den teimbaji sorkar meyong totzü company tem-Indian Oil Corp (IOC), Bharat

Petroleum Corp Ltd (BPCL) aser Hindustan Petroleum Corp Ltd (HPCL) indang lir.

Parnoki asüng nungi teshimtet yimti pungu nung anogoshia jenjang repringshimba maparen tenzüksü aser kobi melii iba maparen ya tanüngba tesemtem nunga inyaksü.

Anogoshia petrol aser diesel jenjang repringshimbaji

Puducherry, Vizag (Andhra Pradesh), Udaipur (Rajasthan), Jamshedpur (Jharkhand) aser Chandigarh nung mezüng tenzüksü, ta IOC-i sangdong ka nung metetdaksü.

Sorkar meyong totzü company temi international jenjangtem den medemdanga, itashia 1 aser 16 anogotem repringshia liasü.

Tang mezüng Dibrugarh-Guwahati tsüngda Shatabdi train senzütsü



Deobarnep Dibrugarh Railway station nung Minister of State for Railways, Rajen Gohain-i Dibrugarh aser Guwahati tsüngda senzütsü atema Shatabdi Express tenzüksüdang agiba noksa angur. (Dibrugarh, April 30)

Guwahati, April 30 (Agencies): Deobarnü Assam nung tang mezüng Shatabdi Express train ka Minister of State for Railways, Rajen Gohain-i Dibrugarh nungi tenzüksü; iba train, Shatabdi Express (No 12085/12086) ya Dibrugarh aser Guwahati yimti na

tsüngda senzütsü.

"Mapang talangka nungi nüngdakba, Guwahati nungi Dibrugarh aser Dibrugarh nungi Guwahati tashi senzütsü atema Shatabdi Express tenzükba ajanga nüburtemtakhangba ataloktsüogo," ta iba sentong nung Gohain-i ashi.

Linük indang Indian Railways nung train tekara rongnung Rajdhani aser Duroto trains den Shatabdi Express train densema lir, koba ajanga yimti tulutem o tourism yimitem na sendakteptsü.

(Maneni tapak 11 nung...)



Kohima, April 29, 2017: Honibarnü APO Hall, Kohima nung GST awareness sentong nung state Chief Secretary, Pankaj Kumar, Chief Commissioner, S K Panda aser Commissioner of Taxes Nagaland, Asangba Chuba Ao nung den tangartem adenba noksa nung angur.

Tobu district jenjang atema CM nem takhangba agütsü

Dimapur, April 30 (TYO): Tobu district atema maneni takhangba agüja Tobu district demand committee leniba nung Tobu tesem nungi nisung 100 dak temai April 29, 2017 anepdang Chief Minister ajurua shidi ka agütsüogo, ta Tobu District Demand Committee Secretary, Shamoh Konyak-i sangdong ka nung metetdaksü.

Tobu District demand committee-i Chief Minister nem agütsüba shidi nungji, Tobu nung yimsüsübaren tsütsü timtem angateta 1987 kum Nagaland sorkari Tobu Deputy Commissioner atema Wb. I. Alienba Ao lemsütsü, aser pai Tobu sub-division nungi Tobu district akumtsü atema

benokbaji tang tashi mataloktsü arur, ta shia lir.

Shidi nungjisa, Chairman, R. Kevichusa (IAS Rtd) leniba nung district administrative re-organization committee 2016-i Nagaland sorkar nem Tobu sub division nungi district jenjang agütsü atema takhangba agütsü, ajisüaka sorkari iba atemaji tang tashi inyaka mali, ta shia lir.

"Tobu district akhangba ya nüburtemi ochi obendang aginüa ola adokba ka lir, kechiyong kum aika iba tesem sendoka yutsüogo aser Tobu tesem kubok yimsüngtemji Mon headquarters nungi kilometer 190 dak tali pilaa lir. Anungji iba takhangba ya yimsüsübaren

nung tashi aittsü atema chichia akhangba ka lir," ta shidi nungjisa metetdaksü.

Honibarnep banquet hall nung senden tatsüka amendang district demand committee co-convenor, S. P Pongba-i chief minister dang nüburtemi timtem balala ajangshiba metetdaksa Tobu district jenjang angutsüji nungdak, ta metetdaksü.

Ano taoba MLA aser Tobu district demand committee convenor, A. Nyamnyei-ia, Tobu aser Moka nüburtemi NPF party ajang-ajanga nungitertem liasü, anungji NPF-i aniba tang aliba DAN sorkari nüburtemi Tobu district atema akhangbaji ataloktsütsü ta ni amanger, ta ashi.

Assam nung ochimashi kanga ajema kumogo: Sonowal

Guwahati, April 30 (Agencies): Assam Chief Minister, Sarbananda Sonowal-i, state nung ochimashi jenjang kanga ajema kumogo, aser par sorkari ochimashi anema maneni raratsü, ta metetdaksü.

Yashi Guwahati nung state Excise Department indang website, 'Excise Online' lapoktsüba sentong nung jembidang BJP lenir aser CM, Sonowal-i, "State sorkari kanga meranga inyakba ajanga state nung ochimashi mapatem- 2005 kum shilem 34 aliba nungi 2017 kumbo shilem 18 dang kumogo,

aser ibaji Assam nüburtemi longjemer inyakba ajanga lir," ta metetdaksü.

Paisa gari 62 semzükja liasü, aser item gariji department indang field staff temi excise ozüng alema inyakba mitba maparen nung amshitsü.

Sonowal-i, "Asenoki alima tatidang balala mepaidoktetba ajanga ochimashi ya adoker. Temesüzükbaji lenmang balalalen nungi arutsü, saka asenoki taginüba azüoktetra ochimashi nokdangtetsü," ta shisem.

Excise Dept-i saru saruba

nung shilem 20 timba kuma jenjang tajungba kumdaksüba atema pai department nema tenüngsang agütsü.

Paisa Excise Department-i 'Digital India' mapatong inyakba atema pelaba lemsatepba den külemi, tang online lapokba ajang yimsüsübaren tashi aittsü aser ochishiba taliba akumtsü, ta metetdaksü.

"Ato kilonser, Narendra Modi-i digital India asangsang nung ataloktsü atema benokba nung state Excise Dept-i mera agia inyakba atema pelar," ta paisa shisem.

L Birendrakumar Singh nem Padma Shri award agütsü

Imphal, April 30 (Agencies): Manipuri musicologist, arishi kum 97, Laishram Birendrakumar Singh nem tawa Padma Shri Award agütsü; iba award ya linük nung civilian award temaba jenjang pezübuba nung lir.

Temang manemi aliba ajanga pa Delhi-i iba sempet agizüktsü atema mouteti liasü.

Honibarnü Chief Secretary, O Nabakishore Singh-i par kidang pa nem iba sempet agütsüba sülen Birendrakumar-i, "Ni kanga pelar. Scientific tsütsü nungi ni Manipur nung sobaliba kenten kanga nendaka study süogo. Iba akhümket sempet anguba tetezü, India sorkari kü mapa tajung reprangtetogo," ta ashi.

Paisa ashiba agi, sobaliba kenten angazükba ajang state nung lokti balala tsüngda apo laja tesünap ajungkettsür.

Lanuwa nungi pai sobaliba kenten nung temelung kanga agütsü, aser iba dak sendakba nung Birendrakumar-i, pei maitsü aser sobaliba nem akhüm agütsüba temaitsü, sobaliba



kenten nem tim akhüm agütsütsü nungdak, ta ayongzük.

Meitei sobaliba aser maitsü wazüka ayutsü atema nisung kati sobaliba kenten angatetsü nungdaker, ta paisa ashi.

Taoba mapang Birendrakumar-i Sangeet Natak Akademi award-a agizükogo aser pai, lanurtemi sobaliba kenten angazüktsüla, kechiyong iba nung ya shisatsü lir, ta ashi.

Ano Chief Secretary, O Nabakishore-ia Birendrakumar nem tenüngsang agüja, nai state nem konang bener arutsüogo, ta ashiba den külemi tarutsü nung nai Padma Bhushan aser Padma Vibhushan awards-a angutsü imlar, ta ashi.



April 29, 2017 nü Capital Convention Centre, Kohima nung World Veterinary Day anogomung sentong nung Animal Husbandry & Veterinary Services Parliamentary Secretary, S. Chuba Longkumer-i Deputy Director (Dimapur Municipality Council), Dr. Inato Zhimomi nem Best Veterinarian Award 2017 agütsüba noksa nung angur.

Director General Assam Rifles Chauhan-i Manipur semdang

Imphal, April 30 (Agencies): AVSM, YSM, SM, VSM, Director General Assam Rifles, Lieutenant General Shokin Chauhan-i anogo asemnü (April 28-30) HQ IGAR (South) semdanga Manipur-i arua lir, aser Major General Virendra Singh, VSM, Inspector General Assam Rifles (South)-i pa nem state tensa indang metetdaksa liasü.

IGAR (South) leniba nung DGAR-i April 28, 2017 nü Manipur Angh, Dr. Najma Heptulla ajurua senden minute 40 shi amendang tenati state dak sendakba onük aika nung o lemtepa liasü.

Ano OORJA' U-19 Football Talent Hunt Tournament 2017 tetenzük sentong nunga Chauhan tongti tesemdang

liasü. Iba sentong nung jembidang DGAR-i, Assam Rifles-i Ato kilonser mangdang, football ajungkettsütsü aser Manipur nung miim sempet sayatsü atema 'Mission 11 Million' inyaker, ta metetdaksü.

April 29 nü DGAR-i IGAR (South) nung Assam Rifles veterans ajurua shisa lemsatepa liasü, aser iba mapang nung parnoki pa dang timtem onük balala metetdaksü aser MHA-i parnok atema inyaksüba mapatong balala indanga jemi.

April 30 nü DGAR-i Manipur Chief Minister, N Biren Singh-a ajuruogo, aser iba mapang nung pai CM den state dak sentakba tensa aser security onüktem nung o lemtepa liasü.



April 29, 2017 nü Zunheboto nung ITP Program valedictory sentong nung Zunheboto ADC, Nungsangmenla Imchen den sorkar mapa inyakerem tangokba noksa nung angur.



Guwahati, April 30: Guwahati, Assam nung yipru tesashi aruba ajanga Guwahati University anasa süngtong aika tera mükepa laodaktsür aliba noksa nung angur.

Assam nungi keyi 6 Buxa Tiger Reserve-i bener aotsü

Guwahati, April 20 (Agencies): North Bengal nung aliba Buxa Tiger Reserve (BTR) nung keyi nütsüng timba kümdaktsüsü nükjitong nung Assam nungi keyi 6 bener aotsü aser iba sentong ya National Tiger Conservation Authority (NTCA) ajanga molungogo.

"Buxa nung keyi timba kümdaktsüsü sentong ya NTCA indang technical committee ajanga agizükogo," ta state Chief Wildlife Warden, Pradeep Vyas-i osangbener dang ashi.

"Assam nungi keyi tepong ana aser tetsü pezü BTR-i bener aotsü," ta pai ashi.

Item keyi tem ya koba mapang bener aotsü, ta asüngdang dang, "Iba mapa ya taküm sa inyaktsü" ta pai langzü. Item keyi trok ya tayimtsü nung bener aotsü aser tesem melenshiba nung yimya sübadaktsüsü asoshi anogo 7 shibanga ketdangsertemi mita repranger BTR nung inoktsüsü. BTR nung keyi asem lir ta forest

department ajanga shiaka mapang talangka iba tesem nung keyi aliba tejangja kuli monguteti lir. BTR ya Jalpaiguri district kübok Alipurduar sub-division nung lir.

Forest department ajanga Buxar-Jaldapara tesem nung keyi nütsüng timba kümdaktsüsü sentong tenzükba ya Wildlife Institute of India aser Global Tiger Forum den asüngdangtepa yanglu.

"Buxa nung keyi litettsüsa yanglushiogo aser parnok achiajemtsü asoshi sentong balala tenzükogo," ta Vyas-i ashi. BTR nung nisung aliba indang tebilemstü asüngdang dang, "Iba tesem nung aliba nisungtemi tesem melenshia tanga nung oa linüra, onoki teyari agütsüsü renema lir," ta pai langzü.

Keyi ajanga nisungtem nem timtem agütsüba nungi kümzüka alitsü asoshi 'special protection camp' amenloka lir, ta Vyas-isa shisem. Iba tesem nung aliba nisungtem ya tesem balaka-i mao tashi Buxa nung keyi bener

oa ayuba ajanga tajangzük magütsüsü, ta keyi indang shisadanger mongintemi ashir.

"Ozüng alema shiruru akhaba aser nisung libaliru ajanga keyi nütsüng tajemba kümdaktsüba ya menokdangtet tashi keyi tesem balaka-i bener oa yutsüsü ya tamakoktsü," ta arem shiruru kümzüka ayutsü mapa inyaker, Belinda Wright-i osangbener dang ashi.

"Keyi kümzüka ayutsü asoshi mapa inyaker peria mali, ozüng alema shiruru tem moabu nung chiyungdaktsüba, arem mi, süng atsüngba aser nakmati atuba ajanga keyi nütsüng tajemba kümdaktsür," ta Wildlife Protection Society of India nung Executive Director, Belinda-i ashi.

"Buxa nung keyi maliba kuli ya mezüng bushitsüla aser iba sülen ang keyi ya bener oa inoktsüsüla. Aji mesüra keyi bener oa yutsüba ji takoksa asütsü," ta keyi taküm shisadanger, Valmik Thapar-ia ashi.

BSNL-i Meghalaya, Mizoram aser Tripura nung Tower 111 enoksemstü

Shillong, April 30 (Agencies): Bharat Sanchar Nigam Ltd (BSNL)-i Meghalaya, Mizoram aser Tripura nung customer service tajungba kümdaktsüsü atema base towers 111 yanglutsü, ta BSNL Chief General Manager, K K Saxena-i ashi.

"Onoki NE-1 circle nung Base Transceiver Stations (Towers) 111 enoksemstü. Iba circle kübok Meghalaya, Mizoram aser Tripura state tem lir" ta Shillong nung

Saxena-i osangbenertem dang ashi.

BTS tower 111 nungi Meghalaya (tang 244 lir) nung 56, Mizoram (tang 141 lir) nung 9 aser Tripura (tang 386 lir) nung 46 asütsü. State asem nung tang tower 771 lir aser phase 7 project kübok sen crore 50 endoka tower talila bendenloktsü, ta paisa ashi.

BSNL NE-1 circle ketdangser Saxena-isa ashiba agi, tower tasen yanglutsü aliba shia jagi nütsüng yongsük

5,000 shi ka yaritsü.

State asem nung BSNL indang customer lakh 8.7 shi lir aser tesüba küm ka tsüngda customer noklang nung shilem ka renlokogo, ta paisa shisem.

NE-1 aser NE-2 (Assam aser tanüngba NE state tem) nung customer lakh 17.4 shi lir. Saxena-isa BSNL indang plan tasen asem tenzükba osang metetdaktsü aser itemji prepaid service atema sen 400 nungi tajemba indang plan tem lir.

Dorjee Khandu asüba anogo bilemteta amung

Itanagar, April 30 (Agencies): Taoba Arunachal Pradesh Chief Minister, asür Dorjee Khandu sür küm 6 ajungba bilemteta Deobarnü sentong ka ayonga agiogo.

Sentong ya Tawang nung aliba Dorjee Khandu Memorial Museum nung agi aser 'Learning History Through Museums' omen nung ajemdaker school outreach programme ka agia liasü.

Iba sentong nung Jang Higher Secondary School, KDS Nursing School, Arunachal Public School, Mount Geshela English School, Tawang Nirman Vidyapeeth, Tawang Public School, Manjushree Vidyapeeth, Mon

Heritage, Choipeling Public School aser Maha Bodhi School tem nungi kaketshir 320 arua aden.

Sentong nung Tawang nungi All India Radio, Ngawang Chota-i asür Dorjee Khandu indang taküm otsü tatsü agi metetdaktsü aser filmmaker & actor Sangey Tashi-i Khandu indang film tatsü ka yangluba sayu.

Maneni, kaketshirtem dang museum ajanga parnok teyari anguba indang metetdaktsüba sülen parnok museum sema anir senzü. Idangji asür Khandu-i mapa inyaktetbatem indang metetdaktsüba den külemi Dalai Lama tenüng nung yangluba gallery sayu.

Tripura nung TMC-i 'anti-Left Maha Jot' tentettsü

Agartala, April 30 (Agencies): Tripura sorkar nung tang yimsü tesüdak aliba Communist Party of India (Marxist) telok den taruba election nung tokteptsü asoshi BJP den-a matentsü saka 'anti-Left maha jot' mesüra tanga telok den lungjemtsü, ta Tripura nung TMC lenir, Sudip Roy Barman-i ashi.

"Asenok BJP den matentsü. Taruba election nung CPI(M) den tokteptsü asoshi 'anti-Left maha jot' telok ka tentettsü. BJP-i Tripura Assembly nung menden kata mangutsü," ta Honibarnü TMC senden ka aliba mapang Barman-i ashi.

TMC nung lenir aser züngsem kar BJP dangi meyiper, ta osang angashia aruba mapang ka nung iba osang ya Barman-i sangoktsü.

Tripura nung taoba mapang TMC tir inyaksang aser Tripura Pradesh Congress Committee nung taoba tir, Surajit Datta, TMC indang Tripura unit coordination committee mendenbuba, Ratan Chakraborty aser state committee nungi züngsem 15 taoba ita BJP nung oa aten.

Barman aser Tripura nung tanga party nungi MLA tem Delhi-i oa central BJP lenirtem

ajuru südi, ta TMC tetsüti aser West Bengal Chief Minister, Mamata Banerjee-i taoba hopta Kolkata nung aliba TV channel ka den osang agiba mapang ashi.

"Banerjee-i ashiba ji tai lir. Onok-i Ato Kelonser, Narendra Modi ajurua Tripura indang tebilemstü lemsatepi ao," ta Barman-i ashi. Saka Modi-i parnok ya majuru.

"Tripura nung TMC lenirtem aser MLA tem ajunga Kolkata-i April 21 nung TMC mungdang nung atentsü ao aser Banerjee ya maneni küm trok Trinamool mendenbula inyaktsü shimtet," ta Barman-i ashi.

"BJP ama masü saka Trinamool Congress ya Left Front sorkar anema nokdaker telok chichiba lir," ta TMC Tripura unit tir, Ashish Saha aser lenirtem densema alidak Barman-i ashi.

BJP ket nung sen aika lir aser item sen agitsü asoshi nisung aika iba telok nung oa atener. Saka TMC meteni telok shinga-ia Tripura nung aliba Left telok ya makoktsü, ta Barman-i ashir.

Tripura nung Assembly menden 60 asoshi election ya taruba küm February ita nung Nagaland aser Meghalaya den külemi agitsü lir.

GNLA temi lanur ka dak azük, nakmati abenba gari nung akha

Tura, April 30 (Agencies): Mapang tatsüka Meghalaya nung telungpur temi timtem magütsü aruba sülen April 27 nung Garo National Liberation Army (GNLA) telungpurtemi South Garo Hills nung Siju aser Baghamara tsüngta Dambuk yimtsüng National Highway-62 nung nakmati abenba garitem dak injang khaloktsü.

April 27 aonung 9:30 ako meta GNLA telungpur südi ta temolung melemtetba nisung 6-7 kati iba tesem nung nakmati abenba gari 4-5 ka dak injang khaloktsü, saka nisung kata makhaset, ta police ajanga

ashi. "Iba osang angashiba sülen police tem-i lendong adalokba tesem aser temeket nung oa mita bushi," ta SGH Superintendent of Police, Abraham T Sangma-i ashi.

South Garo Hills nung Rongara PS kübok Dambuk Atong yimtsüng nung GNLA telungpur südi ta temolung melemtetba nisung 5-6 kati kaketshir arishi küm 14 tain ka dak April 25 nung azük. Item nisungtemi asüngdangba melangzütetba ajanga tanubusang dak ya azük, ta osang ajanga ashi.



Guwahati, Apr 30 : Deobarnü Guwahati nung BJP executive senden ka amendang Assam Chief Minister, Sarbananda Sanowal-i o jembidang tangokba noksa nung angur.



TIR YIMYIM

YIMOBILEM (EDITORIAL)

DIMAPUR MONDAY, MAY 01, 2017

Moatsü amonger

Taküma memetetika moatsü mapang aruogo. Ibai asenok asoshi mapa nungi anogo ishika anisüngzük agir pelatepa benjong amongtsüba mapang lir. Atangji, nisung taküm ya mapa mapa inyakba agidangbo taküm ali meshizüker, saka mapa meranga inyaka belemba yari pelatepa benjonga amongtsüla. Aji oda, benjong amongtsü asoshi mapa meranga inyaksüla aser meranga inyakba nungi anguba temoatsütemji yimsür yimer, kinunger aser medemertem den lemsatepa benjong amongtsüla. Nisung shia asoshi taküm nung ibaji jangratemtsüka lir. Akhi tsürabur mapang nungi benjong amongtsü asoshi mapa talila inyaka rongsen bendenba sobaliba liasü. Aji oda, benjong nung achitsü asoshi kidang ak ajep aser ano zünger tenteta sen aadena ayu. Iba amaji küm piyong benjong nung achitsü ak ajepba aser sen bendena ayuba agi nashi alia moatsü nep nashi aser akji tsüngseta kinunger adianu aser züngartem lemsaa achibaji jangratemtsüka liasü. Ibaji shi lemsaa achiba kisung masü saka temeim aser tepela lemsatepa mapa ka liasü. Atangji, tanüa yimtsüng aika nung kasa sobalibaji bentshia alitsü. Ajisüaka, ano yimtsüng aika nung iba ama benjong amongba sobaliba samadaksüogo. Iba jagi moatsü anogo agi moatsü memesük süidaksür aser mapa mapa dang ashi, kenüa kinunger adianu, kiyonger, medemer aser yimtsüryimertem den pelatepa chiyongtepa temeim lemsateptsü mapang mengutetter. Atangji, ano tanü putu nung benjong memongtetbaji makamaitba agia memongtetter, kechiyong nisung aikati alua mayimer aser tanga mapa nunga temulung magütsür ta anogo shia kazülen mapang endoker. Iba jagi benjong amongtsübaji yutsür chiyongsüa mangu timatempa kibong aika lir. Ano, telok karibo benjong amongtsü asoshi tanga dang tenlaa meshia amonger. Iba amaji telok karibo benjong amongba sentsüh menokdaksütsü asoshi benjong sentong nung tongti tesemdang jaoker. Item tangatetbaji kenyongi tai aser asen akhi tsüraburtemi benjong amongtsü tenzükba tetezü aser nükjidong menentsür. Akhi tsüraburtem mapang nungi monga aruba benjongmong Moatsü aser Tsüngremmong ya limapur asüba mapang tenzükba among asünungji, tanü asenok Khristan purtemi item amongtsümong amongba ya tai amato bilemer. Ajisüaka, tai süra benjongbaji masü saka amongba yimybaji asütsü. Aji oda, Christmas benjonga Tsüngrem tenüng sanga sarasadema amongtsü melen yijemtepa mongra Christmas amongba yimyaji tai asütsü. Iba tangatetba nung asenoki Moatsümong ya amongtsüla. Moatsü ama benjong amongba yabo chiyongtepa amongba mapang dang masü saka sobalibaren angazükba mapang lir. Iba mapang ya pei akaba ajak sübor kimaktepa senzüba aser shijep agütsütepba sobaliba yimya ya Aor sobaliba tajungtem rongnung ka asütsü. Atangji, moatsümongsa asüyonga tanübo akhi limapur mapang amongba amato masü saka Khristan purtem ama kimaktepa mapang nunga kensü kasa nung tanü asen putu dak apetba ken tasen mejema tenteptsüla. Tanü asenoki sobaliba ken tasen mejema atentsü kangabo mebilemer, iba jagi ken a akhi ken, otsüla obolua nungertem atenba kentem dang atener. Ashiko, iba jagi tanü amongba purtem rongnung moatsü ama tsürabur benjong amongtsübaji temulung ajunga agibo magizüker südi. Aji oda, tanü putu nung akhi otsüla oboula nung mapang nungi tenzükba aruba sobaliba aser amongtsümong meindoki tajungba aser tapetba kuma yanglushir amongtsübaji kanga nungdak kümogo. Atangji, mapa keccha meinyak küm piyong benjong dang monga mejajatsü saka asenok ama Ao kin mesüra Naga kin rongnung benjong amongba sobaliba melira nübertema mapa meranga meinyaktsü aser benjong amongba malinungji asen limaji mangyimer limaang ka mesüka tepreper tepreper asütsü. Aji oda, tanü putu tasenba nung asen tamangba yimsü, mapa inyakba yimya aser libaliro den putepa sobaliba benjongmong ya amongtsü asoshi ajungshitepra, iba jagi nübertem mapa, ano talila, meranga inyaktsü. Iba tangatetba tasenba nung asenoki akhidang dang nungibo tanüang merataketba Moatsü aser Tsüngremmong mongtettsü.

OLEMSABANG

Benjong Lima (Land Of Festivals)

- P. Renthly Jamir

(Yashi adok nungi...)

Tangar Statetempo toktsür Mizoram, Sikkim limatemia joko rongsen kettsüng nung Nagaland ajateta aor. Parnok asüküma benjung mulungsener meinyaki anogo shia moatsüa mamunger. Saka tali taremsür ajaki meranga mapa langkabosa inyaker, kechiyong meinyaki chiyungba lima Tsüngremi yanglua maka. Ano tangar sobaliba benjungtemji asenok ama nashi, ak tepsetepa yi taluposaba benjung masü. Joko sati benjung nunga asüngteta meshiteta sati asü koma ta masü AON ITEM kwi asü ta, tasüdaki ao nunga Ak kwi apu ta bangpet jemi. Khristmas benjungjia zünger shi achitsü atema dang yongyar. Alemlü kidang tanur mesüzükdang moatsü dangbo shi den chiyungdaksütsü tetezü küm nung shi ken. Aser moatsü dang shi achitsü atema zünger alui anogo tuku ter oa sen aahzüka ayu. Tanübo Khristmas zünger ta ita shi sen 200/300 sarur karbo pi dang apua agütsür. Mapai oa aahba kecha mali. Aser 'Land of Festivals' nung Naga nung noklang nung noklangi alu yima aruba tang aluyimer azüngteptsü mali. Aser governmenti yimtsüng putui nüburtem dang alu ayimtsü majungshir. Aser lanurtemi oboula obala nung moatsü Tsüngremmong anogo troknü azüpöksüsüa chiyungsü koimai nangtena yur chiyongtepa among ama-ang bilemer. Asen tsürabur shibai medemer merji hachihango mazü chidiyungdia pa dang metsüngzübok aten ta atetaponga aru. Sobangsang ama azümasen hali manger auso nung chi melen tsük yaoker agütsüba otsü ya nüsanüpong purapen jembiba masü. Tanü lanurtemi moatsü, Tsüngremmong atema lottery ayokba, donation saruba magutsübur ta aikati ashir. Parnok benjung mulung asen mapa mulung masü.

Akhi mapang Naga nung tetsür tebur tenüngmesenshi taremsük ajak oda tzüpongbangmashir talak mesüsa pei yari milepalepa mapa inyak. Anungji 1963 Nagaland State agütsüdang Nehru yamai ashi, "Ni amanger Naga nung tasütait mapa nung temulung tagütsü teinyaknü tanela atenba nüburtem yagi Nagalima yimchiyung renlok daksüba dang masü tali awaloka oa Indian union rangben terenlokba nung takar kümdaksütsü." Saka aji kenyongi meyiptep (olta) aser tang parnok minister secretarytem Delhi-len ongpanglu tsükbener ama sen kua, talila kua, atu agi mepiri, kechiyong onok nation workers yirenra taputiplen omer ta tapu tapu tenüng atemer atazür. Aser kakubang tzü agi masüng ama takümbo periogo ta kodanga mangashir. Nehru asülen nungi Naga nung ya komaka repranga alitsü. "Ni Naga nung dang ashiba to tzürongrong nung ken tendokanga," ta mulung shiranga alitsü südi.

Tanga Naga nung tuluba nungi tilaba tashi tzümar jang sen asem agi k.g ka alitsü chiyonger mechiyungma angur, alu katsü yimshitsü ta bangpet jembia jang ya Modibai par jangpong nungi yateta agütsür masü. Ya aluyimertem tenilak nungi asentzü sena teperem jia belemseta inyaker züsentetba lir. Modibajia aluyimertem mesür. Ya zülua lir. Chubaji alu jagiang mesür (Sayu-5-9). Joko aluyimer sensaker indang aria bilemetsürbo shianga mali. Minister MLA tem bangpet o ajungaji Yimjung, Solution nation workers atema bilemetsür. Parnokbo kaara achitsü mekara machitsü solution ka arura ojang. Nation workers nükjidang tongtetra ojang. Naga lima nung meyaki chiyonger saru, saru indang jembir telokbo zünger mezüngma lir. Shitakba nation workers bo mali.

Ano tanü Naga lima AROGO takangba tayimtenba olaji kua, agüjang maneni sarasademjang. Taküm 2017 NBCC NMM Mission Week PRAY FOCUS onük 20 (metsü) nung mapa meranga inyaktsü aluyimer ali nungi moatsüba atema sarasademtsüba ojang kata mangur. Missionary sayutsungir, political leaders nation workers, NGO Indian leaderstem atema yimjung atema ta-ang lir. Alima ya yimjung kija agibo teperi makümer. Yimjung nung tebok tazüng süra auyatsü. Nangzükba Kannan lima, Mamatzü aser Ninang mochitzü ayimer ta jembir saka parnok teti Tsüngrem dang, "Ne temeshidak kotak nungi repranga yokang aser ne nübur Israel aser ozü tsürabur dang nangzükba mamatzü aser ninang mochitzü ayimba lima moajangma" Taz-26-15.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet zülur-i bilemba ken-o ama tazünger-i angateta agitsü mepishir

Benny Hinn'er ministry indang office tem mita ao



Texas, April 30 (Agencies): IRS nungi bushisüngdangertem aser U.S. Postal Service nungi inspector temi Benny Hinn'er ministry indang office tem mita repringba sülen anogo ka lir Benny-i ketdangsertemi par arogo indang inyakyim kar repringdang ta ashi.

Taoba Bodbarnü Grapevine, Texas nung Benny'er ministry indang office tem mita repringa liasü.

"Taoba mapang sangdongba ama Benny Hinn Ministries-i sorkar ketdangsertem den amalitepa mapa inyakdar. Parnoki Arogo nung maparen kar mita repringer. Tesüiba küm ishika ketdangsertemi ministry kanga mita repringer aser iba bushisüngdang ya jungjunga dang tembangsü ta onoki tamang lir" ta Facebook nung

Benny Hinn Ministries-i metetdaksü.

"Onok den yaritepertemi temeiem sayuna, sarasademsüba aser pusema nungitba atema Pastor Benny-i kanga pelar. Yisu Khristai aneptsüba Osang Tajung prokshitsü atema onoki alima ajungalen maneni mapa inyaksü" ta sangdong nungsa shia lir.

IRS ketdangsertem dena federal agent aikati Hinn'er office tem nungi süngdentem bener oya angu. Parnok yagi saru magütsüba dak sendakba ken o tem bushisüngdang, ta NBC 5-i metetdaksü.

Benny Hinn'er office tem mita aoba osang social media nung prokshiba sülen nisungtemi 2007 Senate inquiry ka nung televangelists 6 dena liasü aser parnok rongnung Benny densema lir ta osang

agütsüsü tenzük.

2007 Senate inquiry ya küm asem shi agi aser iba mapang arogo indang tayimtsütem, kiojentem aser sannüker o parnok kinungertemi credit cards amshiba ken o tem bushisüngdanga liasü. Ajisüaka, aibelena inyakba kulitem balaka menguteti tembang.

Benny Hinn ya Israel nung Khristan kibong ka nung aso aser par ministry-i kümshia sen \$100 million den teimba aazüker. Nisung kari Benny ya tangar ashioktsür ka ta tai tongloktsür aser pa kaa itta aliba atema aitsür.

2009 küm ABC indang "Nightline" nung sensaksem dang Hinn-i pa ashikülaker ka masü ta ashi.

"Ni nisung ashioktsür ka asübo, küm 35 dak tema inyaka arudang ni ashioktsürtemi ni pur tepuokdak yula" ta pai ashi.

Khristantemi Archbishop 2 kümzüktsü atema US sorkar dang mepir



Washington, April 30 (Agencies): Change.org petition tasen ka ajanga America nunger dang archbishop ana pua aliba kümzüktsü atema mapa inyaksü ayongzüker.

February 2013 nung Father Michael Kayyal aser Father Maher Mahfouz na Turkey arrtsü anasa Syria nung apu.

Tena chioktsü atema jembishinü asütsü atema aodang ano archbishop ana- Boulos Yazigi aser Gregorios Yohanna Ibrahim na apu. Iba lendong nung tena mena aliba gari driver tepset aser tena pur ao, aser iba iba anogo nungi tena indang osang kecha mali.

International Christian Union

(ICU)-i tang United States sorkar dang Yazigi aser Ibrahim na pur aoba ken o angatetteptsü atema mepishir aser parnok züluba petition nung nisung 1,100 den temai sign süogo.

April 22, 2013 nü Aleppo nung Greek aser Syriac Orthodox archbishop ana- Boulos Yazigi aser Gregorios Yohanna Ibrahim (U.S. senso) na Syria nung pur ao. Tena gari anir Deacon Fatha' Allah Kabboud bo iba mapang tepset, ta petition nung zülua lir.

Iba lendong atalokba sülen küm 4 süiogo saka tena ano mangur. Mapang kabo tena rongnung nisung ka dang taküm lir ta olulutem jembio, ta ICU-isa metetdaksü.

Turkey arrtsü anasa tenati putir ana chioktsü atema jembishinü asütsü orr meyipa arudang tena apu. Yazigi aser Ibrahim natiji February 2013 nung pur aoba Father Kayyal aser Father Mahfouz na chioktsü atema jembishinü asütsü atema aoba liasü.

Freedom of Information Act nung ajemdaker aser pur oa alir rongnung kabo US senso ka asünung, onoki United States sorkar dang tena chioktsü atema mapa inyakang ta mepishir. Tena ya Tsüngrem aser arogo tenzükertem lir aser meimchir temeten tenung nung tena bushitsüla, ta ICU- züluba petition nungsa shia lir.

Onoki United States sorkar dang Turkey, Saudi Arabia, Qatar, Israel aser Syria linüktem den iba ken o benoka jembitsü mepishir, ta parnokisa shisem.

Tena sür lira, tena indang mang timi aremtsü atema agüjang ta ashitsüla. Tsüngrem sayatena ajanga tena rongnung ka taküm lira, U.S. President, Senate aser Congress züngsemtemi iba tesem nung aliba linüktem den jembishinü pa kidangi anir arutsü atema mapa inyaksü mepishir, ta ICU indang petition nungsa shia lir.

ANO GO ABEN TSÜNGREM DEN

TSÜNGREMER ANGATI SEMPET

"Kechiyong temenen taaji tasüba lir; saka asen Kibuba Khrista Yisu nung Tsüngrem angati sempetji teti taküm lir" Rom 6:23

Asenok ya Tsüngremi jenjang tematiba nung yangluba lir. Tsüngremi pa shisatsü, tangatetba, aser pa tashi nung ajemdaker, pa mesükba nung asenok ya yanglu, atangji asenoki Pa nem maneni tenüngsang agütsüdi, kechiyong Tsüngremi asenok ya tajung, temerük, aser takokba lenmang nung alitsü yokba lir.

Saka, asenoki tashi manga nung asenok temenen nung alang aser tashi mangaba taaji tasüba agütsü. Saka asen Tsüngrem, taochi agi moshia aliba aser Temeim agi sünga aliba Tsüngrem asü nung, asenok temenen lar kümer aliba Tsüngremisa tanaben asenok ya alangzük.

Tanü asenoki kechi inyaksü? Asenok ajak nem Tsüngremi angati tekümtet agütsü, Pa Temeim ya atemzükba maliba temeim lir. Tsüngremi sempet koba asen alima rongsen, tashi agi malangzüktsüba lir, iba teti taküm sempet koba kotaki anitsü tashi lir asenoki ajangzükti.

SARASADEM:

Teti taküm agütsüsang Tsüngrem! Iba sempet tulu asoshi onoki Nü dang kanga pelar. Amen

China nung human rights lawyer ka aitsür



Human rights attorney Li Heping

Tianjin, April 30 tepuokdak ayur.

(Agencies): April 28, 2017 nü China kübok Tianjin tesem nung Communist Party-i okadak miima ken o ka angadanga nung Khristan human rights lawyer ka dak tai tongloktsü aser pa kinungtsü aputsü atema tasa atong.

Human rights attorney Li Heping küm ana jungnüa tepuokdak ayuba sülen China okadak kati April 28, 2017 nü pai linük anema mapa inyak ta tai tongloktsü aser pa küm asem tepuokdak ayutsü temerenshi agütsü.

Tepuokdak ayuba den külemi Li Heping ji küm pezü suspension den ano pa dak nungi küm pezü atema 'political rights' agientsü.

Iba obendang ajanga pa chioktsü akok saka ano sorkari pa dak temulung melemi bilemra ano tanaben aputsü akok.

Tepuokdak nungi chiokba nisungtemi foreign media den sensaksemba mesükba sorkari tuyuba alema inyakra Communist Party-i tanaben pur

ChinaAid founder aser president Bob Fu-i ashiba agi, sorkari küm pungu dak tema Li Heping mita repringtsü akok.

Sorkari Li dang pa kinungtsü Wang Qiaoling den tongtepreteptsü aser la Tianjin-i arutsü atema mesüzükang ta ashi, saka parnok indang tebilembaji la aputsü atema liasü.

Ajisüaka, Li kinungtsü pa dang la taküm lendongi aitsü akok anungji pa chiokra Beijing-i arung ta dang shir phone ayu.

Li ya July 10, 2015 nü par kidang nungi pur ao. China nung human rights lawyer tem apuba mapang ka nung pa apu aser iba maparen dang "709 case" ta ajar, kechiyong sorkari lawyer tem apubaji July 9 mesüra 7/09 anogo nungi tenzükba liasü.

Li pur mezüng ita trok tashi tepuokdak alidang, electric batons dena tanga reshikangshiba inyakyim balala amshia pa dang asüngdangya asü aser pa aiben süchia ao.

OLONG PAITEP # 4408

1		2		3			4			5
							6			
7										
						8				
						9		10		11
			12							
	13									
14						15				
16										
			17							

TIPLÉN

- 2. Putupur - (6)
- 6. Lenmang balala - (4)
- 7. Rong tulu - (5)
- 8. Ataloktsu indang ashi - (4)
- 13. Keta-asen - (4)
- 15. Yim ka - (5)
- 16. Kongru - (4)
- 17. Jaksa-jaklem - (6)

LANGTSÜNGLEN

- 1. Prangpong nung akaba - (6)
- 2. Tsüngrem tenung ka - (6)
- 3. Tama - (6)
- 4. Mamatzü agütsüba shiruru - (5)
- 5. Tzünglu den külemi tsükba - (3)
- 9. Küm tarensen - (6)
- 10. Ayong tulu - (6)
- 11. Tarutsü atema mangdang - (6)
- 12. Ajak dak atongba wara - (5)
- 14. Tezüng atema mesüba shiruru - (3)

OLONG PAITEP # 4407 TELANGZÜBA

TIPLÉN :

- 1. Ayaterm, 7. Anünü, 8. Aiben,
- 10. Kiralongrar, 13. Nükla,
- 16. Barnü, 17. Süngpak.

LANGTSÜNGLEN :

- 2. Yangji, 3. Tenü, 4. Mapa, 5. Hombar,
- 6. Lanur, 9. Hbn, 10. Kanga, 11. Raktep,
- 12. Ajunga, 14. Anis, 15. Tang.



2017 APRIL ITA LILI RESULT!

April ita nung Lili tajungtiba (First) shimteta tanü yangi lephsia agütsür. Lili zülur-i May 10, 2017 tashi nung Tir Yimyim Office nungi senpet agizüktsü mepishia metetdaksür.

KODANGA TATEMPANG MATONGTSÜ

- Tampur** - Tesayur Alok. Okolai mangatetba ka asüngdangdi ni?
- Alokba** - Koda kechi asüngdangner.
- Tambur** - 1997 nungi telong nung alir o India Govt na tsünga ajurutepe jempili "next round of talk" ta dang paper nung adokli ano ajurutepli yamajidang süli senshili tasa asübatu kechi tetezü aka?
- Alokba** - Aya oko ajia tetezü memetetna "round ji" tatempang maketa asürba tangaja.
- Tambur** - Yamajina ajibo tatem kati marutetsü ama angateter atu, süra ano tang tejempidak August 3 "framework agreement" ta jempiba ya kechi aka?
- Alokba** - Oko ina, na asangwa asüdang nü noksa ka frame nung tongoka ayubatu joko na semchira terok jungako saka nü noksa tu memelenshi südi?
- Tambur** - Ni enoka ayuba amatu memelenshii lirja, frame nung ayuba kudasür melenshitsü to.
- Alokba** - Iba dangji "frame work agreement ta ajar adi.
- Tambur** - Oh Alokba !!!

Lilir : E-Mail

TANÜBO NAI LANGZÜANG

Q: Union Minister shibai HIV patients atema Test & Treat policy tenzüktsü?

- [A] Narendra Modi [B] Maneka Gandhi
- [C] Jagat Prakash Nadda [D] Nitin Gadkari

(Taruba adok nung onoki langzüksü)

YASHIADOK TELANGZÜBA : Bhubaneswar

Tepela Tasoba Anogo



Tanur asoba anogo nung salem osang den noksa angali adokdaksünürs - Tenüng, Küm, School, Talidak & salem osang tejanga zülur, noksa (photograph - any size) ka den anogo 3 mesüra 4 jela e-mail : tirymyim@gmail.com nung yokang mesüra Tir Yimyim bureau tem nung agüjang.

1. Tenüng :

2. Tasoba anogo:

3. Küm : 4. Class :

5. School :

6. Talidak :

7. Salem osang :

NAIA YA METETER MA



Alima nung kanga teyira nisung teimtiba aliba linükji Nauru linük lir. Iba linük nung nütsüng shilem 95 bo temang touzük dang nungi touzük tali lir aser nütsüng shilem 71.7 bo kanga teyiratem lir, ta World Health Organization's (WHO)-i asadangtet.

SUDOKU # 3521

	8	3			2			
		9	4			6		
5			9			3		
1			8			3	2	
6	2		3	4				
4			5	2		6	7	
3	7	1	2					
9	2					7	4	
8			1	6				

TELANGZÜBA # 3520

3	9	5	4	2	6	7	8	1
8	4	7	9	1	5	3	6	2
2	1	6	3	7	8	5	9	4
5	2	3	1	4	9	6	7	8
7	6	1	2	8	3	4	5	9
9	8	4	5	6	7	2	1	3
1	5	8	7	3	4	9	2	6
4	7	2	6	9	1	8	3	5
6	3	9	8	5	2	1	4	7

OJANG LUTEP # 4013

- AANTIDGT :
- AAALLB :
- JAKA :
- ÜKOTTSSKTEA :
- SREÜNGMTI :
- NOSEAK :
- EMN :
- ASTIH :
- JAÜAG :
- RIL :

OJANG LUTEP TELANGZÜBA # 4012

KIBONG NUNG APUANI NA SENTSÜ
MAJEMRA TANGAR KIBONG KODANGA MEMENEPTSÜ

Anü ita petinu ajanga alima nung tsüngsang mopung melenshidaksüba ama nisunger tia-a melenshidaksür ta anü ita petinu tetzürtemi ashir, parnoki ashibaji shidak asü tai'ar nai-a na asoba ita anogo den tanü nü tia medemdangang (Horoscope):

- Aries** 21/3-19/4
Tanü nai kinungertem den ajurutepa mapang indoktsü asoshi sentong kar yangluang. Nü mapa aser yimten yimsüsüba nung inyakba ama na asoshia nai inyaktetsü.
- Taurus** 20/4-20/5
Na mapa inyakba tesem nung amshiba yimya nür kinunger den mamshitsüla. Tebilemdangba liang aser shisa kaa mapatem inyang.
- Gemini** 21/5-20/6
Nai majurutetba kinunger kar den nai jembitsü bilemetsü südi. Nai kinungertem den külemi sensaksem akaba ajanga nenok tsüngda tesendaktep tajungba akümtsü.
- Cancer** 21/6-22/7
Nü tashi dak tali mapa inyaktsü memerangtsüla. Kinunger kari na jashidaktsütsü akok. Tesüiba mapang nü den mepelatepi aliba nisungtem den yimjung yangluang.
- Leo** 23/7-22/8
Kidang tanutsür aser tanuburtem den nai tanü mapang indoktsü jangratsü. Nai jangraba ama parnok nem shisa tajung agütsütsü mapang tajung asütsü.
- Virgo** 23/8-22/9
Tarutsü anogotem asoshi tanü nai sentong kar yanglutsü mapang tajung asütsü. Kinungertem den külemi pelatepa mapang indoktsü merang.
- Libra** 23/9-22/10
Kibong ya kanga tongtibang ta nai bilemang aser kinungertem den mapang indokang. Saka mangatettep adoktsü aliba onüktem mejembitsü merang.
- Scorpio** 23/10-21/11
Tanü nai kinungertem den kanga kümdanga jembishinüang. Nü dang kanga agi tainba mesüra tanütsü-tanubutem den kümdanga jembishinüang.
- Sagittarius** 22/11-21/12
Tanü nai kisüng alitsü jangratsü aser shisa akar den sensaksemtsü bilemetsü. Sentong tajung kar yangluang aser nü dang tainba nisungtem nungi shisa agiang.
- Capricorn** 22/12-19/1
Nü mapa inyakdak anibelemba ama nai nür kibong atema mebilemetsüla. Tanü na kinungertem den anisüngzüka kazütsü mapang tajung lir.
- Aquarius** 20/1-18/2
Nür medemer kanga kümdanga shimang aser o kümdanga jembiang. Kinunger tsüngda nung shisa agütsüteptsü tanü mapang tajung asütsü.
- Pisces** 19/2-20/3
Tanü nai medemer kar nem teyari agütsütsü südi. Nai tangar kanga junga angatetba ajanga parnok tsüngda mangatettep alibatem nai tajungba küma yanglushitsütsü.

Kentener Zayn Malik tetsüng yirur lir

New York, April 30 (Agencies) : Tesüiba mapang kentener telok, One Direction nung dena alisang, kentener Zayn Malik tetsüng tabelen yiruba ajanga pa tetong aser model Gigi Hadid'er kidangi wheel chari ka nung nunger aru.

Zayn-i pa yirur liaka tetong den ajurutepibo ao aser ibaji ajanga pai Hadid meimba tali jungkai adoka sayur.

Noksa kar nung pa wheelchair ka nung mener tangoka lir.

"Zayn tetsüng yirur lir, ajisüaka pa junga lir aser ajungtsü," ta pa atema inyaker kati ashi.

Zayn aser Hadid na 2015 November ita nungi medemtsü tenzükba sülen nungi mapang aika nung tena külemi angur.



Amy Childs-i mezüngbuba tanur, jala ka aso



Noksa nung Amy mashisa aliba mapang tetong Bradley Wright tena yimdong nung jajaba angur.

Binky-i mezüngsüa Amy den pelaba lemsatepa tweet asüba nung, "EEEEEEK kanga junger !!!! Na aser nür kibong den tepela lemsateper aser alima nung tepela ajak nür meyong süang!" ta zülua lir.

Amy tanur asotsü anogo ang lia ki takdang azükba jenjang nung ajempeter mezüzüka alua tsük.

Arishi küm 26 tain, Amy-i, "Taoba hopta ni takdang azükba nungi jenjang ajemjir alua tsük. Iba mapang temesüla indang temezüng pezü tashi alu aser temang nunga zübu kar keta yiru," ta ashi.

"Ni kanga aoksa aser ni kidang kü den yaritepla aritepa aja, ajisüaka ajak junga liasü kechiba süra ni kongyimi lua anen aser ibaji süli kü tebok nung kü jala arakzüba ni meteta kü tetsübu samadok aser ni timtem mali ta bilema aru. Ajisüaka ni alangli kanga aoksaba agi tenük nungi nüktsü alua liasü," ta laisa ashi.

Amy-i, "Ni mashisa akümer amai asüba agi scan pezüben tashi agidang ni jala ka bena lir ta jangja," ta ashi.

Ashiba agi Amy aser tetong Bradley Wright nati tena jala asoshi tenüng pungu yuja lir aser item tenüngtem rongnung ka la nem jatsütsü.

London, April 30 (Agencies) : Amy Childs-i lemstepba ngua Amy-ia: "Kanga pelar, ozü jala ajak tabensa nung sotetogo," ta tweet asü.

Pregnant Made In Chelsea Amy aser tetong Bradley Felstead-i Amy mezüng tanur Wright na jala mezüngbulaji asoba osang metetdaksü, aser tanep, Deobar anepdang 6:42 ako nung aso.




Arishi küm 24 tain actress/singer Selena Gomez-i April 27 nü Inglewood, California nung The Forum sentong nung shilem agidang la sapurtem den tangokba noksa ka angur.

TAN HOPTA ATEMA - KOMA SÜLA ?

Q. Govt office ajak nung anogo shia biometric system amshia tenüng aja nunga koma süla ?

Olong 20 shi nung May 05, 2017 tashi nung iba telangzüba ya onok dangi
 e-mail - tiryimyim@gmail.com mesüra SMS - 9856121232 / 9436072422 mesüra Tir Yimyim Facebook account ajanga yokang. Telangzübatemji taruba Hokolbar nü adoktsütsü.

'Ricksharani' kensep agi 'rickshaw' anirtem tushir



New Delhi, April 30 (Agencies) : Airtel 4G ajungkettsüla, Sasha Chettri-i "Ricksharani" kensep sayatsü renema lir, aser iba kensep ya rickshaw anishirtem asoshi sangro ka mesüka lir.

"Ni Mumbai nung mapang talangka tesünep aser sen bushiba nung mapang intoka liasü. Ni ki aiben belena kiyong ka nungi kati oa liasü. Ni iba amaji jajaba mapang rickshaw tem den mapang aika intok. Ni tang sayatsü aliba kensep tenüng ajanga anogo shia kangasa meranga inyaka, yimti nung teyari agütsürtem, rickshaw anishirtem nem tenüngsang aser tetushi agütsür," ta lai osangbenertem dang ashi.

Iba kensep ya May ita nung sayatsü aser kensep nung aliba kenji komala ta asüngdang dang lai, "Kensep nung aliba kentemji tekara dang...Bollywood tsüngsangba kentem mesüker!" ta lai langzü.

"Kü ken single ji reprangdangang, iba ken nung Sachin Gupta-i acha ayangtsü aser Adil-i choreograph asü. Iba single ken tenüngji 'Besharam' lir," ta laisa ashi.

"Ni rickshaw anishir kati pa taküm otsü agi kanga ajungmeso. Paji arishi küm 32 tain aser taküm jenjang tajungba akümtsü amanger nisung ka liasü," ta Sasha-i ashi.

Iba rickshaw anishisang jagi, "ni rickshaw anishia sen aaba ajanga khenü anogo kü nija

shishilemba mapa tenzüksü," ta ashiba laia osangbenertem dang metetdaksü.

"Pa kanga tasü tait aser tashi tait nisung ka liasü aser pai pa den Tsüngrem dena lir aser pa Tsüngrem tembar ta ashi. Ni kadang aji angashi, ni kangasa pela bilem. Ni Mumbai nung ajangshia metetba ajak kecha mali amai kümdaksü," ta Dehradun tsür, Sasha-i ashi.

Arishi küm 24 tain, Sasha-i model aser acting asüba den ken-a atener.

"Ni lanuwa asüba mapang nungi ken tena liasü. Ni acting kanga sapur. Ni teti kü sasa ken zülua liasü aser iba mapang nisung kari ni ajungshiba ajanga model asütsü tenzü. Ni item mapa ajak inyakner, ajisüaka shitakba shidi süra ni kentenba tejangraba aser iba jagi ni peladaksür," ta lai ashi.

"Ni arishi küm 13 asüba mapang nungi gitar atemer. Ni kiyim benjong aser ano tanga sentongtem nung ken ajanga shilem agia liasü," ta "Katti Batti" film nung shilem agilai ashi.

Lai, "Ni film kar nung inyaksü bilemdar aser ken-a kar atentsü," ta tesüiba mapang army ketdangserer jalai ashi.

Baahubali 2 agi India Cinema melenshitsütsü:Mahesh Bhatt

Mumbai, April 30 (Agencies) : S.S. Rajamouli-i direct asüba film "Baahubali: The Conclusion" agi India cinema nem tenüng tasen aser temelenshi tasen bener arutsüogo, ta film yanglur Mahesh Bhatt-i ashi.

Bhatt-i ashiba agi, iba film ajanga India nunger film tem yimya khenyongi melenshitsütsü.

"Baahubali..." ajanga asenoki Hindi film tsütsü meteta aser angateta aliba ajak tasen kümshidaksür," ta Bhatt tweet asü.

July 2015 nung sayaba, 'Baahubali: The Beginning' film ajanga box office nung sen crore 600 tashi aateta liasü. Iba tesüngmangtsü otsü ajanga film sapurtem süngmandaksüba ajanga ano Hokolbarnü India



rangben nung nüburtemi "Baahubali 2" Hindi, Tamil, Telugu aser Malayalam oshitem nung screen 6500 nung sayatsü atatepa liasü.

Iba film nung Prabhas, Anushka Shetty, Rana Daggubati aser Tamannaah nungeri tongti shilem agia lir.

Google indang CEO, Sundar Pichai itasen anogoshia sen crore 3.52 angur

Hyderabad, April 30 (Agencies): Google indang CEO, India nunger Sundar Pichai nem taoba küm 'compensation' sen million \$ 200 agütsü aser iba sen ya 2015 küm anguba dang anaben agi timba liasü. Taoba küm Pichai nem ita sen \$ 650,000 agütsü aser 2015 küm bo pa nem ita sen \$ 652,500 agüja liasü.

Mapang talangka nungi Pichai ya Google nung mapa inyaka arur aser 2015 küm August ita pa nem CEO mapa agütsü aser 2016 küm 'stock award' sen million \$ 198.7 pa nem agütsü aser iba sen ji 2015 küm agütsüba sen million 99.8 dang nungi anaben agi timba liasü.

Pichai nem sen aika agütsüba aser CEO mapa agütsüba ya company nung committee ka shima iba telok ajanga achayanger. Google co-founder aser taoba CEO, Larry Page indang nükjitong melena tang Alphabet kübok inyakba

mapang ka lir.

Pichai lenistüba nung Google ajanga 'advertisement' aser YouTube ajanga shishilembaba nung renloka odagi. Iba kisüng masü saka 'machine learning', hardware aser 'cloud computing' amala nunga sen aika indoka maparen tasen bushisüngdangba mapang lir. 2016 küm Google ajanga smartphone, virtual reality headset, router aser 'voice controlled smart speaker' amala oset tasen aika sayaba ajanga Pichai nem ita sen timba agütsür, ta company ajanga ashi.

Google indang 'hardware' aser 'cloud service' amala ajanga taküm kisüng nunga sen billion \$3.1 aazüka lir aser iba sen ya taoba küm ita pezü tsüngta aazükba nungi shilem 50 agi timba lir.

Alphabet ajanga sen aaba nunga taküm timba lir aser taoba hopta tashi nung sen billion \$ 600 junga aazüka lir.

2017 Radio Disney Music Award akokertem yamai alitsü



Kelsea Ballerini, Sofia Carson, Britney Spears, Hailee Steinfeld, aser Jamie Lynn Spears

California, April 30 (Agencies): 2017 Radio Disney Music Award sentong Microsoft Theatre, Los Angeles nung agiogo. Iba sempet ya tanurtemi sapuba ken, kentener

aser iba amala mesükba tapu balala nungi shimteta sempet agütsür. Iba sentong ya Jordan Fisher, Kelsea Ballerini, Sofia Carson, Jenna Ortega aser Alex Aiono nungertemi ketdangsüa ani.

2017 Radio Disney Award sentong ya Deobar aonung 7:00 ako nungi Disney Channel nung sayuogo.

2017 Radio Disney Award angurtem yamai alitsü:

ICON AWARD Britney Spears	FIERCEST FANS Harmonizers (Fifth Harmony)
HERO AWARD Nick Jonas	Best Song That Makes You Smile "24K Magic" - Bruno Mars
BEST FEMALE ARTIST Ariana Grande	Best Song to Lip Sync To "Work" - Rihanna feat. Drake
BEST MALE ARTIST Niall Horan	Best Dance Track "Cold Water" - Major Lazer feat. Justin Bieber & MØ
BEST GROUP Fifth Harmony	Best Breakup Song "Shout Out to My Ex" - Little Mix
SONG OF THE YEAR "Treat You Better" - Shawn Mendes	Favorite Tour Revival Tour - Selena Gomez
Breakout Artist of the Year Alessia Cara	Radio Disney Country Favorite Artist Kelsea Ballerini
BEST NEW ARTIST Grace Vanderwaal	Radio Disney Country Best New Artist Maren Morris
Best Collaboration "Bad Things" - Machine Gun Kelly & Camila Cabello	Radio Disney Country Favorite Song "Peter Pan" - Kelsea Ballerini
Best Crush Song "Let Me Love You" - DJ Snake feat. Justin Bieber	Favorite Social Media Star Jake Paul

VIP yimya samatsütsü asoshi PM-i sentong yangluba Preity-i pela agizük

Chandigarh, April 30 (Agencies): India nung VIP yimya mamshitsü asoshi sorkari sentong yangluba atema actress Preity Zinta-i pelaba olen ka Deobarnü sangdongogo.

"Asen Ato Kelonser asoshi nisung ajak tongtipang lir aser pai iba ama mapa inyaker. Linük tejakleni anir aoba kisüng masü saka nüburtem ajunga tensema tejakleni anir aotsü asoshi inyaker. Pa ama Ato Kelonser ka asenoki ngutetba ya kanga tia taka," ta arishi küm 42 tain, Preity Zinta-i ashi.

"Beti Bachao-Beti Padhao sentong ya kanga junger aser ni meimer. Tetsür ka asoshi kümzüka alitsü aser kaket

shisatsü angutsü ya tongtipang lir. Ni mitkar ka tanur asünung, Ato Kelonser-i linük asoshi bendanga agütsüba onük tem mitkar den jembiba ngua ni kanga pelar," ta laisa shisem.

Bollywood nung la indang mapa tem asüngdang dang, "Kü indang film yakta sayatsü. Anu film tasen nung shilem agitsü akok," ta lai langzü.

Preity Zinta ya tetsürtem kümzüka alitsü asoshi mapa balala inyaka arutagi.

"Kü takum nung mapa tulu ka lir, aser iba mapa ji tetsürtem kümzüka alitsüba atema lir. Iba maparen nung ni küm pongu tashi inyaka arutagi aser taküm nünoki angutsü," ta Preity Zinta-isa ashi.



External Affairs indang Parliamentary Committee züngsem pongui Ladakh nung Leh semdangba mapang sepai ketdangsertem den tangokba noksa nung angur. (Ladakh, April 30, 2017)

Tir election ajanga BJP anema party tem longjemtsü: Sharad Yadav

New Delhi, April 30 (Agencies): Tir election atema opposition party temi longjemer candidate ka shimba ajanga BJP anema party tem longjem tenzüksü, ta tanü JD(U) lenir, Sharad Yadav-i ashi.

Taoba hopta pai Congress tongti, Sonia Gandhi ajurua opposition party tem longjemer Tir election atema candidate ka shimtsü asoshi jembia liasü.

Taoba mapang JD(U) Tir, Yadav-isa, "Opposition party tem longjemtsü mapang tongogo, kechiyong tawa Uttar Pradesh aser Delhi municipal elections nung takok anguba tongtibangba kuliji, BJP nung madenba party tem vote lemsaba ajanga lir," ta ashi.

Opposition party tongtitemi BJP-i aniba NDA candidate anema opposition candidate ka shimtsüji melungtsü asü? ta osangbenertemi asüngdangba

langzüdang pai, ibaji ataloktsü imlar, ta ashi.

"Tir election atema akokba tashi opposition party aika sabang ka nung longjemtsü asoshi onoki merangdar. Longjemer candidate ka shimba ajanga BJP anema opposition party tem longjem tetenzüker asütsü," ta paisa ashi.

Rajya Sabha züngsem aser taoba mapang Union minister-isa, Uttar Pradesh election nung BJP-i menden 403 nungi menden 312 tashi nung takok angu, ajisüaka Samajwadi Party, BSP aser Congress senteper vote shilem teimba angu, ta ashi.

Tir election nung opposition candidate ji shiba asütsü? ta asüngdangba langzüdang pai, tenüngtemjibo tesülen ang lemteptsü, ajisüaka party tem tama longjemtsüla, ta ashi.

Nisung aikati Tir election atema opposition candidate

asoshi Yadav shimtsü südi ta jembidar, aser pa dang iba indang asüngdang, saka pai telangzüba magütsü.

JD(U) tongti aser Bihar Chief Minister, Nitish Kumar aser Left party lenir Sitaram Yecury natia mapang balala nung Sonia Gandhi ajurua Tir election atema opposition party tem longjemer candidate ka shimtsü asoshi jembia liasü.

Tir ya electoral college-i shimmer aser tawa BJP-i Uttar Pradesh assembly election nung takok anguba sülen parnok jenjang tajungba kümogo, anungji iba election nung NDA candidate-i takok angutsü südi ta bilemer.

Ano külen opposition lenir aikati, taruba Tir election nung opposition party tem longjemra 2019 küm Lok Sabha election nung ano party teimba longjemer BJP anema tokteptetsü, ta bilemer.

June 15 nungibo UP lenmangtem nung ongken malitsü: Yogi

New Delhi, April 30 (Agencies): June 15, 2017 nü tashi nungbo Uttar Pradesh nung aliba gari lenmangtem nung ongken kata malitsü, ta Deobarnü state Chief Minister, Yogi Adityanath-i metetdaksü.

"Gari lenmang nung ongken aika aliba state ji UP liasü aser aonungbo lenmangtem khenyongi tammang liasü, ajisüaka June 15 tashi nungbo UP gari lenmangtem nung ongken malitsü aser tesangwa alitsü atema onoki inyaktüsü lemtepteto," ta pai ashi.

State nung electric light dak sendakba nung UP Chief Minister-i,

"District headquarters ajak nung mapang ajak nung electric light alitsü, jila HQ shia nung anogoshia light ghonda 20 alitsü aser yimtsüng nung anogoshia ghonda 18 light alitsü atema onoki inyaktüsü," ta metetdaksü.

Paisa, state sorkari 'divyangs' (Persons with Disability or differently-abled) atema pension sen 300 aliba nungi sen 500 kümtsütsü, ta metetdaksü.

Ato kilonser, Narendra Modi-i matamabensartem taküm jenjang ajungkettsüner, ajioda sorkari nüburttem yaritsü atema scheme aika benoka inyaker, ta paisa ashi.

"UP assembly elections nung BJP-i majority agi takok anguba ya Ato kilonser, Narendra Modi indang welfare schemes ajanga lir. Modi-i Gorakhpur nem AIIMS agütsü aser küm 26 tashi shibanger aliba fertilizer plant asentenshia tanaben lapoktsü," ta paisa shisem.



Mumbai, April 30, 2017: Deobarnü Mumbai nung Union Railway Minister, Suresh Prabhu-i Yoga Institute küm 100 ajungbamung sentong nung Yoga Institute indang Logo sayatsüba noksa nung angur. Kasa noksa nung Yoga Institute Director, Hansa Yogendra (abelen) aser kongki atemer mongin, Shivkumar Sharma (ajichilen) nata angur.

India tasenba nung VIP masü saka EPI sobaliba alitsü: PM Modi

New Delhi, April 30 (Agencies): Tanü Ato kilonser, Narendra Modi-i, India tasenba nung VIP (Very Important Person) masü saka "EPI" (Every Person is Important) sobaliba alitsü, aser 'digital India' den külemi iba atemaji inyaka arudar, ta metetdaksü.

Ita shia radio ajanga linük nüburttem den jembiba sentong, Mann ki Baat nung jembidang Ato kilonser Narendra Modi-i, "VIP sobaliba ajanga India linük nem takoksa agüja aruogo. Ni ajangshiba aser angatetba agi, light teremji garitem nung inoker, ajisüaka ibaji nisungtem koloki idaktsü aser ibaji ajanga VIP sobaliba ya tenteta liasü. Tangbo nisungtem melungjang nungi beacon light temeremji agentsüla. Tang nungibo VIP sobaliba masü saka EPI- India nung nüsüng crore 125 pronglaji tongtibang asütsü. Asenok ajak longjemra mangdang/nükjidong ajak

ataloktsü atema asenok dak tashi alitsü," ta metetdaksü.

Centre sorkari tongtibang nisungtem indang garitem nungi red beacon nokdangba atema linük senso tetsür kati kü dang pelaba metetdaksüogo, ta Modi-isa ashi.

"Swachh Bharat ajanga gari lenmangtem nung VIP-a merüketogo. Tangbo lenmang ajanga nung India nung ajakji VIP lir ta lai kü dang ashi," ta Modi-isa shisem.

Modi-i lanurtem danga taruba mei sodi mapang nung tesem tasen semdangtsü aser teka mapa balala angazüksü ajungshiba den külemi digital currency amshitsü ajungshi.

"Tang lanurtem aikati digital currency amshidar, saka ano angazüksü akok. Sen aazüksü atema sorkari nenok nem maangka tulu agütsüogo. BHIM app amshiang aser iba osangji tangar nema metetdakjang aser sen aazükang," ta paisa ashi.



Srinagar, April 30, 2017: Kashmir kübok Kupwara district nung April 27, 2017 nü security sepaitemi injang yokdang nisung ka khasetba anema tanü Deobarnü separatist-i ayongzüka longkak aitba anogo nung Security sepaitemi Srinagar yimti lenmangtem anükba noksa nung angur.

South Asia Satellite May 5 nü tenzüksü

New Delhi, April 30 (Agencies): India-i South Asia linüktem nem sempet, South Asia Satellite May 5, 2017 nü agütsütsü, ta tanü Ato kilonser, Narendra Modi-i sangdong.

Iba project nung adentsü atema Pakistan linüki memelung, anungji iba project nung SAARC (South Asian Association for Regional Cooperation) linük ti nungi Pakistan dak alaka tanüngba linük tenetbo longjemogo.

"Asen kidangertem (kidanger linüktem) den amalitep alitsüla, aser asen kidanger linüktem nunga terenlok alitsüla," ta Modi-i ashi.

"May 5 nü India-i South Asia Satellite tenzüksü. Iba satellite ajanga iba project nung shilem agiba linüktem tajangzük angutsü," ta paisa metetdaksü.

Iba ya India-i sen aika jenjang sempet agütsüba lir, ta shia Modi-i, iba ya South Asia linüktem ajak amalitep ajungkettsüba mera ka lir, ta ashi.

"Iba ya onoki South Asia

atema bilemja inyakba tatishitsü ka lir. South Asia satellite ajanga tesem ajungalen lenla ajak nung terenlok alitsü," ta pai ashi.

Pai ashiba agi, iba satellite ajanga Natural resources mapping, tele-medicine, education aser IT connectivity amatem nung tajangzük angutsü.

India dak alia iba project nung shilem agiba linüktem- Nepal, Bangladesh, Bhutan, Sri Lanka, Maldives aser Afghanistan linüktem danga pai pelaba lemsatop.

South Asia Satellite ya touzük seret 2,230 lir aser iba satellite yanglutsü atema küm asem agia liasü. Iba project nung sen crore 235 intoka liasü.

Iba satellite ajanga South Asia tesem ajak ayimjemtsü. Ajisüaka iba project nung shilem agiba linüktemia parnok indang infrastructure amenoktsüsa akumtsü, aser iba atemaji India-i yaritsü melunga lir, ta metetdaksüogo.

Iba satellite mission ya küm 12 shi atema asütsü.



Kathmandu, April 30, 2017 : April 30, 2017 nü Switzerland nunger tenemi atur Ueli Steck tasümang Kathmandu, Nepal nung aliba hospital atongba noksa nung angur. Nübur aikati jangja aliba tenemi atur Switzerland nungba ya tenemi atuba mapang Mount Everest, Nepal anasa lendong ajurua asü. Pa tasümang anguba sülen Mount Everest tesem nung tayimtsü anenba tesem ka dang aliba, Lukla-i bener ao.

France election:Le pen-i sen tapu ana amshitsü benok

Paris, April 30 (Agencies) : France far-right National Front lenir aser tan linük Tir election nung tokteper candidate, Marine Le Pen-i, France nung sen tapu ana amshitsü benok - ka linük telung nung amshitsü aser ka bendanger linüktem den shishilemba dang amshitsü -- kechiba süra lai euro joko süogo ta bilemer, ta Deobarnü ashi.

"Tanga linüktem amai linük telung nung amshitsü atema sen balaka aser ka International nung amshitsü," ta asübaji lai France osangbenertem den jembiba mapang ashi.

Lai shinübaji French franc ji linük telung nung amshitsü aser euro ji international company tulutem den shishilemba dang amshitsü.

May 7, 2017 nü France Tir

election shilem tanabuba nung Emmanuel Macron den tokteptsü alila Le Pen-i, "France nung mapa manguba ya Euro dak tuluka keta lir kechiba süra euro amshiyim ya France rongsenkettsüing nung ano yimya mesüba, ta ashiba osangbenertemi metetdaksü.

Ni Tir election nung takok angu nungbo ni European Union (EU) den nüngdakba pezü -- tesem kümzüka terenlok mapa inyaksü, yimsüsübaren, rongsenkettsüing aser sen inyakyim tsütsü olemtep akatsü, saka iba olemtep nung EU-i tamakok aludaktsüra euro dak sendakba tebilemstüji France nüburtem nem vote ajanga bentetdaksütsü, ta lai shisem.

"Vote agitepba mapang nüburtemi, 'nunga' ta vote süra

ni mapa nungi anentsü," ta Tir akümstü teimla alila, Le Pen-i ashi.

Le Pen-i euro toktsütsü benokba ajanga nüburtem koda masü kumdaksüogo. France nunger noklang nung shilem 70-i Euro amshiner.

Lai euro komaser kechi tasa ka agi toktsütsü ibaji atema lar Front National party dena mangmangteper.

Lai ano linük nung tang benshia aruba inyakyim kar melenshitsu shiogo aser item temelenshi nung immigrant tanurtem nem angadi kaketshisatsü agütsüba shibangtsü dena lir.

Tang Tir meden angutsü jenjang tajungba nung alisang Macron ji Le Pen-i koka la Tir akümstü amai lai kanga temulung lema bilemer.

Cuba: Military tayimtsü tsükokdang nisung 8 asü

Havana, April 30 (Agencies) : Honibar anepdang Artemisa province nung Cuba military indang tayimtsü ka tsüngkokba lendong nung tayimtsü nung mena aliba military nisung 8 asü, ta linük osangbenertemi metetdaksü.

Iba tayimtsüji Cuba Revolutionary Armed Forces indang liasü aser iba tayimtsü jagi linük yimtiba Havana

anüdoklen tsütsü aliba Artemisa province tenem ka nung oa atsük, ta osangbenertem ashi.

"Iba tayimtsü nung crew dena military nisung 8 asü," ta Ministry of Revolutionary Armed Forces-i ashiba linük nung osangbenertemi metetdaksü.

Russia nung yangluba, AN-26 tayimtsüji anepdang 6:38 ako nung Playa Baracoa airport

nungi apuso. Iba airport ji Havana tezülen lir aser tayimtsüji apusor kobi melii Candelaria jila nung aliba Loma de la Pimienta tenem nung tsükloka oa atsük.

"Iba tayimtsüji komaser tsükok ibaji bushisüngdangtsü asoshi Ministry of the Revolutionary Armed Forces nungi telok ka tentetogo," ta sangdong ajangsa ashi.



Harrisburg, April 30, 2017 : U.S. President Donald Trump (tiyong)-i pa Tir mendeni tur April 29, 2017 nü anogo 100 ajungnü Harrisburg, Pennsylvania, United States, nung senden ka nung jembiba noksa yangi angur.

ASEAN-i North Korea dang international-i tuyuba angatsü ashi

Manila, April 30 (Agencies) : Association of Southeast Asian Nations (Asean) nung lenirtemi North Korea dang international-i tuyuba teinyaksütem shishia agitsü ashi aser Pyongyang-i mid-range ballistic missiles tendangba atema-a ola adok.

Linük ter (10) -- Brunei, Cambodia, Indonesia, Laos, Malaysia, Myanmar, Philippines, Singapore, Thailand aser Vietnam -- lenirtem Honibarnü 30buba annual summit aser retreat sentong kaogo, ta osangbenertemi ashi.

Philippine Tir, Rodrigo Duterte-i tan Asean senden mener külen Deobarnü nü sangdong ka metetdaksüogo.

"Onoki Korea peninsula tebilemstü rasaa jembigo aser iba tesem nung DPRK-i 2016 küm submarine-launched ballistic missile aser ballistic

missile technology amshia nuclear ana tashi tendangba dena tang tatalokdak tensa agi kanga shisabuludaktsür," ta Asean lenirtemi senden temer külen sangdong ka ajanga metetdaksü.

"Onoki North Korea dang tangsa tang international temzüng ozüing alema inyakba aser UN Security Council temzüngi ashi mangaba anentsü shiogo," ta lenirtemi ashi.

Parnok lenir ter jagi, Korea Peninsula nung nuclear amshiba anendaktsüba nung nungittsü aser linük ana tsüingda yimjung alitsü asoshi inyaksü, ta ashi.

"North Korea-i pei sasa tashi aziüoka tesem nung security, yimjung aser tesünep bener arutsü kanga ajungshia metetdaksür," ta lenirtemisa ashi.

Asean telok ya tenteter taküm küm 50buba ajunger.



Jeddah, April 30, 2017 : Deobarnü Jeddah, Saudi Arabia nung Saudi Crown Prince Mohammed Bin Nayef-i Germany Chancellor Angela Merkel agizükdang la den salemba noksa nung angur.

Afghanistan:Mita aoba mapang telungpur 43 tepset

Kabul, April 30 (Agencies) : Afghanistan nung military operation aoba mapang tajemba agi telungpur nisung 43 tashi tepsetogo, ta Deobarnü Interior Ministry sangdong ka ajanga metetdaksü.

"Tesüiba ghonda 24 tsüingda nung Afghanistan National Defence aser Security Force tem lokteper Kunar, Wardak, Nangarhar, Zabul, Logar aser Kunduz province tem nung kiralongrartem mita aoba mapa ti tashi inyaka liasü," ta ministry

sangdong nungji shia lir.

Military temi mita aodang tepsetba telungpur rongnungji Islamic State (IS) züngsem 17 liasü aser ti yiru, ta kasa sangdong ajangasa ashi.

Iba sangdong nung military tem yiruba osangbo kecha shia maliasü.

Afghanistan security force temi telungpur anema mita aoba mapa kanga sashia tenzüka inyakdar, kechiba süra tang mapa ya Asia tenem tsütsü teti rara adokba mapang lir.

Pakistan gari lendong nung nisung 11 asü

Khyber-Pakhtunkhwa, April 30 (Agencies) : Deobarnü Khyber-Pakhtunkhwa province nung passanger anir jajaba bus gari ka lenmang lenerlen lua tsükokba lendong nung tajemba agi nisung 11 tashi ashi, ta police-i ashi.

Lowari Top anasa atalokba gari lendong nungji nisung aika yiru aser item teyirurtemji mozü kidangi ilunga bener ao, ta osangbenertemi ashi.

Police-i ashiba agi, iba bus gari anisangi kula ka meyipba mapang

pai aniba gariji mazüoktetba ajanga iba lendong atalok.

Iba gari nungji nisung 20 dak tali mena liasü aser iba bus ji Rawalpindi nungi Chitral-i aoerba iba lendong ajuru.

Pakistan nung gari lenmang kanga majungba, gari mashi aniba aser temzüng shitak mamshiba ajanga gari lendong kanga ataloker.

Pakistan osang ajanga ashiba agi, küm shia gari lendong 9,000 shi atalokba nung nisung 5,000 shi asür.

Regional film nung Hindi 'subtitle' inoktsü lemetba Stalin-i aitsür

New Delhi, April 30 (Agencies): Regional film tem nung Hindi indang 'subtitle' inoktsü asoshi sorkari sentong yangluba anema DMK working president, MK Stalin-i Deobarnü aitsüogo aser Centre dang kuli meshir.

Iba sentong ajanga Regional cinema tem nung iba oshi tashiyim agi amshidaktsüsü meranger, anungji DMK-i iba anema nokdaktsü, ta pai ashi.

"Regional oshi ajunga kasa akhumtsüba amshitsüla, aser

Hindi oshi ajanga arakmoka ayutsü merangba ajanga linük nung telongjem aser yimjung raksatsütsü," ta Stalin-i osangbener dang ashi.

"BJP sorkari cinema nung dena Hindi aser Sanskrit oshi amshidaktsüsü sentong yangluba ya ajaki aitsütsüla. Iba onük ya Centre-i jangshitsütsüla," ta pai metetdaktsü.

1960s mapang Hindi oshi anema DMK-i state nung longkak aita liasü.

National Film Development Corporation (NFDC) nung regional film tem nung Hindi indang 'subtitle' inoka amshitsü asoshi Parliamentary panel ka ajanga Tir nem agüja lir aser iba ajanga Hindi oshi nung film reprangnür nem maangka agütsütsü.

Film yanglurtemi film nung jembiba o ajunga Hindi oshi nung meyipzüker NFDC nem agütsütsü asoshi Committee of Parliament on Official Language ajanga tetuyuba agüja lir.

Yijemer kinüngbu dak azüktsü atema MP Minister-i kiyimla nem süng agütsü



Bhopal, April 30 (Agencies): Madhya Pradesh nung lokti kiyimba sentong ka nung kiyimla 700 jungnüa nem Minister kati 'morgi' ta ajaba süngtsük (wooden bat) agütsü.

Iba süng ya shidakbabo süoshi shidokdang amshir, saka kinüngbutem temesepba yi jema mesüra kinüngtsütem merenshiba mapang amshitsü asoshi Minister-i kinungtsütem ajungshi.

Item süngtsük nung 'yijemer dak azüktsü sempet, police-ia kecha mashitsü' ta zülur agütsü.

Sagar district nung aliba Garhakota tesem nung Honibarnü 'Akshaya Tiritiya' benjungmong nung lokti kiyimba sentong nung Panchayati Raj aser Rural Development Minister, Gopal Bhargava-i iba sempet ya tetsür 700 shi nem agütsü.

Iba sempet ajanga nisung aika mangmandaktsüba tensa

ka nung lia, kinüngbutem yi ajemba ajanga timtem adokba lemsateper kinüngtsütem aika ni ajuruogo, anungji iba sempet ya kanga tapet lir, ta Minister-i ashi.

"Kodang ni ozü constituency semdangi odir, kinüngbutem yi ajemba indang khuretem kü dang ashir. Parnoki aaba sen kinüngbutemi yi ajemtsü asoshi rakzüka bener aor, ta kü dang shiogo. Ajidang masü saka parnoki tetsürtem dak züka merenshir," ta Bhargava-i osangbenertem dang Deobarnü ashi.

"Tetsür kati la kinüngbu yi ajemba anendaktsüsü asoshi süngtsük agi azüktsü asü, ta asüngdangba mapang iba sempet agütsütsü ni apitet," ta Minister-i ashi.

Iba yongji yi ajemer kinüngbutemi züka merenshir tetsür nem iba sempet agütsütsü asoshi süngtsük 10,000 yangludaktsü.

Yi ajemba ajanga lokti menentsüba nungi temelenshi bener arutsü asoshi ibai mera tasen ka asütsü, ta Minister-i ajitet.

"Iba tebilemtsü ya sorkar aser police kisüngi makoktsü. Iba atema nüburtem tejakleni arutsüla. Nüburtemi shilem agiba ajanga temelenshi tajungba bener aruba tatishitsü otsütem aika lir," ta Bhargava-i ashir.

"Ozüng alema temesepba yi ayokba tebilemtsü ya state ajunga nung lir. Aser nüburtemi tejakleni arua shilem magi tashi iba tebilemtsü ya makoktsü," ta paisa ashi.

Yi ajemba ajanga takoksa aludaktsüba o tem ya kinüngbutem den tepang agi tama jembitsü aser iba ajanga temelenshi marura 'morgi' nem jembidakang, ta Minister-i shisem.

Bhargava ajanga lokti kiyimba sentong ya mapang talangka nungi ayongzüka arudagi aser pai tetsürtem dang süngdong atemtsü aser ozüng alema mapa tamajung meinyaktsü ajungshia liasü. Paisa tanurtem nem kaket shisatsü shidak agütsütsü asoshi tsüraburtem ajungshi.

"State nung yi anema nokdaktsü sentongtem tenzükdagi saka mezüng nüburtem nem tesayuba agütsütsüla. Aser ibaji kanga tenüngdaktsü," ta pai shisem.

Office of the Dimapur Kangtsüng Senso Telongjem Tenüngsang Agütsür

Sp. Imkong Jamir, S/o. Wb. Imtikanzuk aser Wt. Imlikala Pongen (Chuchuyimlang) na jabaso-i tawa tembangba Yodha Fighting Championship (YFC) nung Amateur Mixed Martial Arts (MMA) 62-66 kgs (feather weight) touzük telemsa tsüngtepba nung temaba jenjang (Champion) nguteta Kangtsüng sensosanger nem konang tulu bener arutsüba asoshi Dimapur Kangtsüng Senso Telongjem (DKST) ajanga pelaba den konang tetushi tulu agütsür. Maneni ne asaya sempet tajung ajanga sensosanger aser asen lima nem konang tuluba bener arutsütsü sensosanger ajaki imlaseta sarasademtsür.

Sd/-
I. Anung Jamir
President, DKST

Sd/-
Alem Pongener
Secretary, DKST



METETDAKTSÜR

- CERC (Conduct of Business) Regulations' 1999 nung regulation-86 aser CERC (terms and Conditions tariff) Regulations '2014 kübok DOCO nungi 31.03.2019 tashi "Transmission system for development of pooling station in Northern part of West Bengal and transfer of power from Bhutan to NR/WR" atema Transmission tariff meshir.
- Iba Transmission system ajanga tajangzük angutsü purtemji : (1) AEGCB, (2) MECL, (3) Government of Arunachal Pradesh, (4) Power and Electricity Department Government of Mizoram, (5) Manipur State Electricity Distribution Company Limited, (6) Department of Power Government of Nagaland, (7) TSEB (8) HPSEB, (9) PSPCL (10) HPPCL (11) PDD JGS (12) UPPCL (13) DTL (14) Chandigarh Administration (15) UPCL (16) RPCC (17) Northern Central Railway (18) BSES Yamuna Power Ltd. (19) BSES Rajdhani Power Ltd. (20) Tata Power Delhi Dist. Ltd. (21) New Delhi Municipal Council (22) MPPMCL (23) MSEDCL (24) GUVNL (25) ED Daman & Diu (26) ED Dadra & Nagar Haveli (27) CSEB (28) MAKVNL (29) KPTCL (30) APTRANSCO (31) KSEB (32) TSEB (33) Electricity Dept. of Goa (34) Electricity Dept. of Puducherry (35) APEDCL (36) APSPDCL (37) APJPCOCL (38) APNPDCL (39) BESCOM (40) GESCO (41) HESCO (42) MESCOM (43) CESC (44) TCTL.

Name of the Project	Transmission system for development of pooling station in Northern part of West Bengal and transfer of power from Bhutan to NR/WR.
Name of the Assets	LLC of Bishwanath Chariali - Agra HVDC line and 400kV 3000MW HVDC POLE-III & Pole-IV alongwith AC assets at Alipurduar for parallel operation of the HVDC station.
Line Length (Km)	400kV-21.32kms, 400kV-6.44kms, 220kV-1.80kms, 132kV-72.95kms
No. of Bays	400kV 3000MW HVDC Pole-III & IV, 400kV-08 nos, 220kV-08 nos.

Apporitioned / approved Capital cost of the (PR)	381613.81 (₹ in Lakhs)
Apporitioned / approved Capital cost of the (RCE)	454536.28 (₹ in Lakhs)
Authority which has approved Capital Cost	Board of Directors of POWERGRID
Schedule DOCO (PR)	15.01.2015
DOCO (Anticipated)	30.04.17 & 31.05.17
Capital cost on anticipated DOCO	365237.04 (₹ in Lakhs)
Tariff for year 2014-15 (₹ in lakhs)	
2017-18	52665.22
2018-19	62348.69

- Tarif latettsü asoshi agütsüba application copy tagütsür indang website yangi enoktsüogo : www.powergridindia.com
- Iba Tarif latettsü agüja aliba nung tebilemba mesüra magizüketba kar dang lira tajangzük angutsü purtemi mesüra nisung mashi kati Secretary, Central Electricity Regulatory Commission, 3rd & 4th floor, Chandralok Building, Janpath, New Delhi - 110001 (or other address where the office of the Commission is situated) dangi yoktetsü aser kasa copyji ka iba applicant corporate office address dangi iba osang adoker anogo 30 tsüngda yoktsüla : "Saudamini", Plot No.2, Sector-29, Gurgaon, Haryana-122 001.

Place : GURGAON Sd/-
Date : 25.04.2017 Addl. General Manager (Commercial)

BJP aser RSS dak... (Tapak 1 nungi...)

BJP sorkari Christmas Day, Good Friday, Holy Saturday aser Easter Sunday tem official anogotem ta sangdongogo aser school tem nung Hindi aser Sanskrit oshitem compulsory kümdaktsür. Parnokisa Bhagwat Gita ya National Book kümdaktsüsü atema tebilemba benokogo aser BJP-i küm asem tashi sorkar ketdangüsü arudang, item sentongtem aser temelenshitem ya mapang agia mapa küma inyaktsü atema atonga inyakbatem lir, ta paisa ashi.

BJP-i Rajya Sabha nung aser state tem nung majority anguba sülen Uniform Civil Code (UCC)

benoktsü. Iba ajanga Linük Temzüng Arrla 370 aser 371(A), (B), (C) amalatem nung temeten balaka agüja alibatem ajak agentsüsa akümtsü. Iba anogo nungji asen maitsü samatsü, kechiyong RSS atema UCC tetezüji Hindu Linük, Hindu yimsü, personal law ka aser tax ka lir, ta K Therie-isa shisem.

Nagaland State BJP nung inyakterem mulungjang nung Khristan tamangba yimsü aser Naga nung maitsü kümzüka ayutsü ta asüba ochi tera danga lira, RSS aser BJP indang tasa anema inyaktsü atema secular teloktem nung adentsü ayongzüker ta paisa ashi.

Tang mezüng Dibrugarh... (Tapak 1 nungi...)

"Iba train nung tang tasentüba, air-conditioned LHB Coaches alitsü koba ajanga anisüngzük tulu agütsütsü. Ainlen senzürttem nem mapang apir tzü pongdang, juice, coffee mesüra süngo den chiyungtsü agütsütsü," ta minister-i ashi.

Paisa tesem nung alirtem dang railway indang osettsüset aser kiojen apayua amshitsüla aser pei meyong ama bilemstüla, ta metetdaktsü.

Ato kilonser, Narendra Modi-

i Northeast tesem terenlok atema kanga nekanda inyaker, ta shia minister-i, Railways-i maneni Northeast tesem nung terenlok atema inyaktsü, ta shisem.

Iba train nung AC Chair Car coach 10 aser luggage-cum-generator car ana alitsü aser yimi ana tsüngda train tenetben anentsü.

Guwahati nungi Dibrugarh tashi senzüba train para nungji chiyungtsü densema lir, aser tain passenger shia sen 1,095 asütsü.



Dimapur, April 30, 2017: April 29, 2017 nü IDANSB [Indian Dental Association Nagaland State Branch] den MMU CECS-i ayonga CEC School, Grace Colony Kuda "C", Dimapur nung "Dental and Oral Health camp" nung tangokba noksa ka angur. Iba sentong nung kaketshir 167 dena dental & oral care teyari agia liasü. Parnokisa dental aser oral hygiene indang lemsatepa liasü.



Deobarnü Jawaharlal Nehru Stadium, Shillong nung Mizoram nungi Aizawl FC-i Shillong Lajong den goal 1-1 nguteta asayaba sülen parnoki I-League takok marok amer pelatepba noksa nung angur. North-East nungi national football league mezüing atema takok angurji Aizawl FC lir. Parnoki Kolkata nungi Mohun Bagan ajangteter temaba jenjang angu. (Shillong, April 30)

9buba Open Basketball asayamung May 24 nü tenzüksü



April 29, 2017 nü 9buba Basketball asayamung nung Convener Teisozhavi Theünuo aser Co-convener Medozhatuo Rutsa na den Suncity ketdangsertemi asayamung indang official logo amer tangokba noksa yangi angur.

Kohima, April 30 (TYO) :

Iba den külemi iba Küm ti tashi masayai aruba sülen, Suncity Club Kohima-i Honibarnü Nagaland nung akhümket basketball asayamung tejen rongnung ka tanaben shia arudaktsüogo.

Iba 9buba open basketball asayamung ya Suncity Club Kohima aser Nagaland Basketball Association (NBA) na lokteper May 24 nungi 27, 2017 tashi Khouchiezie, Kohima Local Ground nung ayonga asayadaktsüsü.

Kohima yimtak aliba Suncity office nungi osangbenertem den jembiba mapang iba asayamung nung Co-convener, Medozhatuo Rutsa-i, tesüiba asayamung 8 ama mesüi tan asayamung yabo flood-lights kübok asayatsü, aser iba tesangwa kübok asayabaji tan mezüing asütsü. Iba asayamung nung state tesem balala nungi telok 20 tashii shilem agitsü imlar, ta ashi.

asayamung ayongertemi iba asayamung asoshi sen lakh asem (3) tashi intoka basketball asayaba moapu yanglushidar.

Pai, tesüiba asayamung 8 tashi nung kidanger state tem nungia, Eastern Railways, Assam Regimental Centre, Shillong aser Faithballers Assam teloktem arua asayaa liasü, ajisiaka tan asayamung nungbo asaya ayongertemi state nung aliba asayartem tendanger amai tanga state tem nungi mejaoktsü, ta ashi.

2008 sülen kechiba iba asayamung anen ta asüing dang Rutsa-i, sen peria maliba ajanga anena ata, ta ashi.

"Iba asayamung ya onok sasa sen tenlatepasa aka, kechiba süra Nagaland sorkar nungi teyari kecha mangu," ta pai ashi.

State nung basketball asayaba jenjang tajungba küma terenlok bener arutsü asoshi iba

asayamung tenzük nü Nagaland Basketball Referee's Association (NBRA) tentetba angutsü, ta paisa ashi.

Pai ashiba agi, iba asayamung nung takok angurtem nem senpet 50,000, tanabuba jenjang nung takok angur nem sen 30,000 senpettem den takok marok aser kulikakettem agütsüsü. Semi final nung tamakok angur telok anaprongla nem sen meyrjang pungugu (5,000 each) senpet agütsüsü. Ano asayamung nung junga asayateter nema senpet agütsüsü aser asaya shia terepranger rongnungi tia takatiba/la nema 'surprise gift hampers' agütsüsü.

Iba asayamung Convener aser Nagaland Basketball Association (NBA) nung Tongti Tezülar, Teisozhavi Theünuo-i Club züingsemtem lia iba asayamung indang official logo sayatsü aser pai, iba asayamung ya Federation of International Basketball Association (FIBA) temzüing ozüing kübok asayatsü, ta metetdaksü.

Asayamung nung shilem aginertemi May mezüing hopta tashi nung mobile no 9436016529 aser 8860054186 na nung osang agitepa tongteprateper tenüing agütsüsü asayamung ayongertemi metetdaksür.

Badminton Asia Championships nung Chen Long-i gold angu

Wuhan (China), April 30 (Agencies) : Tang World no. 1 aser Olympic champion, Chen Long-i Deobarnü asayar mongin, Lin Dan madak 21-23, 21-11, 21-10 agi takok ngua pa asoshi Badminton Asia Championships nung mezüingbuba gold nguogo.

China rangben tebur kija asaya nung Chen-i meimlai ka asayar tajung ka madak takok angu, ta osangbenertemi ashi.

Mezüingbuba set asayadang asayar anaprongi kangsa junga

asayatet aser iba set ji Lin Dan-i 23-21 agi akok. Aji süaka iba tamakok ajanga Chen-i temulung ajema mebilemi kanga meranga asayatsü tenzükba ajanga Lin-i aiben zükpeta liasü aser Chen-i set anaprongla kanga kara dang 21-11, 21-10 agi akok.

"Ibai ni asoshi Asia Championships 7buba lir aser ni gold medal nguogo. Gold medal angutsüji melarabo masü," ta Chen-i ashi.

Tesüiba mapa iba

asayamung nung Chen-i silver medal 3 aser bronze medal-a 3 ta ngua lir.

Ni tatemsabuba set ana nung junga masayatetba ajanga tanü iba tamakok angu, ta Lin-i asaya temer külen ashi.

"Aji oda süaka tan hopta ni kanga junga asayatetogo," ta Lin-i shisem.

Honibarnü semifinal asaya nung Lin-i Malaysia nunger Lee Chong Wei madak set ana atonga takok ngu final asaya tashi atong.



MAY 01, 2018 ASAYA

Mumbai VS Bangalore - 4:00 PM

Pune VS Gujarat - 8:00 PM

APRIL 30, 2017 ASAYA OSANG

Punjab-i Delhi wickets 10 agi akok

Sunrisers Hyderabad-i run 48 agi Kolkata Knight Riders akok

SMI-i "Throttle Thrust 2" ayongtsü

Dimapur, April 30 (TYO) : Spearhead Motorsport Initiative (SMI), Mokokchung-i Moatsü mung nüngtem nung motorsport sentong, "Throttle Thrust 2" May 2 nungi 3 2017 tashi, Longrangdang, Longmisa Village, Mokokchung nung ayonga akatsü, ta Throttle Thrust 2 Convenor, Imnaonen Pongen-i sangdong ka ajanga metetdaksü.

Sangdong ajanga ashiba agi, iba tetoktepba ya asemsü küma lemdanger akatsü aser item telemsaji yamai alitsü: Cross country 4x4 (SUV), Sprint (Below 1300cc, above 1300cc) aser Autocross (Below 1300 cc, Above 1300c, SUV).

Iba tetoktepba sentong mezüing nü Parliamentary Secretary for Tourism, C. Apok Jamir aser tananü Addl. Chief Secretary & Finance commissioner, Govt. of Nagaland, Temjen Toy na tongti tesemdangertem asütsü, ta sangdong ajangasa ashi.


Iba tetoktepba nung takok angurtem nem agütsüsü senpetji sen lakh 2 tashi renema lir aser iba den külemi takok marok aser kuli kakettem dena agütsüsü. Anungji shilem aginertemi Autocare aser Meren Workshop, Mokokchung na nungi form agi nung ajungtsü, ta kasa sangdong ajanga metetdaksü.



Lucknow, April 30, 2017 : Seema Suraksha Bal(SSB) IG, Alok Sharma aser saisapong tsütsü tongtibang nisungtem den Sa Re Ga Ma Pa Little Champs nung takok angula, Priyanshi Srivastava nungeri aruyaa aliba U-19 Talent Hunt Football Asayamung, Lucknow indang OORJA-CAPFS Jersey Deobarnü sayaba noksa nung angur. Iba asayamungji May 2, 2017 nü nungi Lucknow nung tenzüksü.

Yimlibilema,
ne temesen anepaluang

LIVSAV[®] DS
Syrup/Capsule



Mfg. by: Medvetra Research Health Products Pvt. Ltd. Thane (Maharashtra),
CUSTOMER CARE:- 022-9430183

BIEMDANGANG

"Na anemer dang masü saka na meimertem dang teyari meshiang."